

唐詩紀事

7117
50441



民國六年一月出版

唐詩紀事

總發行所上海文明書局



唐詩紀事序

唐人以詩名家姓氏著于後世殆不滿百其餘僅有聞焉一時名輩滅沒失傳蓋不可勝數敏夫閒居尋訪三百年閒文集雜說傳記遺史碑誌石刻下至一聯一句傳誦口耳悉搜採繕錄閒捧宦牒周遊四方名山勝地殘篇遺墨未嘗棄去老矣無所用心取自唐初首尾編次姓氏可紀近一千一百五十家篇什之外其人可攷卽略舉大節庶讀其詩知其所恨家貧缺簡籍地僻罕聞見聊具所得先成八十一卷目曰唐詩紀事云灌園居士臨邛計敏夫有功敘

慶元辛酉禧從大諫傅公游于凌雲邂逅灌園季子次陽總幹蓋禧戊午類試坐主也因得是書立命十數吏傳錄其閒不能無魯魚亥豕之誤繙閱累年手自讎校十是正其七八餘則傳疑不敢妄加損也夫文章與時高下而詩發於情帝王盛時採之以觀民風在治忽春秋之時趙孟請賦詩以觀鄭七子之志季札請觀樂以知列國之風世之君子欲觀唐三百

重刻唐詩紀事序

宋計有功唐詩紀事宋刻本不可見余所有者嘉靖本二種及汲古閣本而已此三種今亦流傳甚少價亦奇昂非五十金不能購所以寒士往往有終身不得一寓目者余印歷代詩話正續編及清詩話凡百餘種今復以此書付諸手民諒亦談藝者所樂觀也是書共八十一卷凡一千一百五十家採摭繁富多資考證唐人詩集之不傳於世者及唐代詩人之軼事頗賴是書以傳其纂輯之功有足多者然芮挺章之國秀集李康成之玉臺後集集中皆附己作又殷璠之英靈集高武之間氣集品藻之語盛見援引而四子名氏開卷邈如朝士如王粲釋子如寒山羽客如呂岩今皆有集行世亦皆遺漏可謂失之耳目之前矣考有功蜀臨邛人祖用章

見東都事略范雍傳

父良輔慶歷進士

見眉州志

有功宣和三年進士自號灌園居士

見五

百家播芳大全

清四庫全書唐詩紀事提要稱敏夫始末未詳引建年以來繫年

要錄謂曾知簡州提舉兩浙西路常平茶鹽公事有功安仁人云云此大

誤也安仁在宋屬饒州鄱陽郡與臨邛相去遼絕今檢要錄作許有功不可以許計字形相似而訛爲一人也校刊旣竣因誌其大略併正提要之舛謬於此以告世之愛讀是書者

民國五年十二月無錫丁福保仲祐識

汲古閣本唐詩紀事識語

唐詩之流傳者不啻連車充棟而正本絕少凡分類分體尤爲可恨余因
据初盛中晚世次每一人全錄一冊卷首著紀略或載本傳卷尾拾遺文
遺事若干則可稱有唐大觀第卷帙浩繁未能旦晚卒業耳既讀計敏夫
唐詩紀事八十一卷雖詩與事未甚詳而姓氏已備於他集且率意散書
無評注眩目頗令人有匡鼎之思第嘉定有王慶長本子已不可得迄國
朝一刻於嘉靖乙巳再刻於萬曆甲午其有遺逸淆訛讀者不能意逆或
一人重見如十三卷十九卷王熊之類是也或一詩重見如第四卷第九
卷凌朝浮江旅思之類是也或脫去本詩如賀知章江皋聞曙鐘趙東曦
上月今朝減之類是也或誤入他詩如虞世南豫游欣勝地韋承慶萬里
人南去之類是也甚至有幾人溷作一人幾題溷作一題或一人一詩反
分析幾首者余參之本集及御覽英華文萃弘秀諸書二百餘種一一釐
正庶幾無遺恨矣若乃白樂天因九老而再見非重例也僧滄浩因畫公

而削去非逸例也至於綦母潛鐘聲扣白雲向誤和白雲王摩詰興闌啼
鳥換向誤啼鳥緩種松皆老作龍鱗向誤皆作老龍鱗云云更定已多未
能悉舉尙容拈出另編作詩林一段佳話爾時崇禎歲在玄默涪灘陽月
下浣海虞毛晉識

唐詩紀事標目

第一卷

太宗

高宗

中宗

第二卷

明皇

德宗

文宗

宣宗

昭宗

第三卷

武后

徐賢妃

上官昭容

越王貞

韓王元嘉

孔紹安

鄭世翼

董思恭

何仲宣

沈叔安

陸敬

袁朗

牛鳳及

朱子奢

庾抱

張文恭

陳叔達

薛收

第四卷

王珪

褚亮

虞世南

蔡允恭

許敬宗

劉孝孫

魏徵

楊師道

岑文本

李百藥

來濟 長孫無忌 杜正倫 馬周 李義府

陳子良 杜之松 崔善爲 王績

第五卷

蕭德言 顏師古 杜淹 裴守貞 胡元範

元萬頃 李敬玄 張文琮 薛昫惑 張大安

薛元超 鄭蜀賓 王德眞 楊思玄 鄭義眞

徐珩 蕭翼 弘執恭 鄭軌 王勣

竇威

第六卷

上官儀 郭正一 喬知之 喬侃 員半千

任希古 蘇味道 杜審言 郭利正 吳少微

富嘉謨 李福業 王適 李崇嗣

第七卷

高正臣 崔知賢 韓仲宣 周彥昭 高球

弓嗣初 高瑾 王茂時 徐皓 長孫正隱

高紹 郎餘令 陳嘉言 周彥暉 高嶠

周思鈞 劉友賢 于季子 東方虬 駱賓王

盧照鄰 王勃勳勳 楊炯 田遊巖

第八卷

陳子昂 邵大震 李日知 李景伯 劉偉之

王無競 袁恕已 郭元震 崔融 張昌齡

第九卷

李適 張錫 徐彥伯 宗楚客 章永慶

蕭至忠 李迥秀 劉憲 崔湜 岑羲

第十卷

趙彥昭 崔日用 李乂 盧藏用 馬懷素

薛稷

劉允濟

李元紘

李嶠

蘇瓌

蘇頲

第十一卷

韋嗣立

趙彥伯

閻朝隱

鄭愔

沈佺期

宋之問

徐堅

盧懷慎

武平一

李行言

韋元旦

第十二卷

畢乾泰

辛替否

王景

韋安石

竇希玠

李咸

陸景初

鄭南金

于經野

解琬

麴瞻

樊忱

孫佺

李從遠

周利用

楊廉

張景原

李恆

第十三卷

崔液

張元一

劉希夷

鄭遂初

王熊

房融

張敬忠

崔珪

沈祖山

盧崇道

徐安期

張紘

薛曜

袁暉

李休烈

邵士彥

吳大江

劉幽求

賈曾

楊齊哲

魏元忠

李夔

司馬承禎

第十四卷

張說

宋璟

王丘

崔翹

王光庭

席豫

梁昇卿

源乾曜

張嘉貞

盧從愿

韓休

徐知仁

崔禹錫

裴灌

韋杭

程行誡

李暹

蕭嵩

劉昇

裴光庭

宇文融

崔沔

崔尙

陸堅

崔泰之

崔日知

魏奉古

第十五卷

王灣

魏知古

許景先

姚崇

姜皎

姜晞

王岳靈

楊顏

鄭繇

張諤

趙仁獎

張翬

金昌緒

蘇晉

張九齡

崔國輔

第十六卷

王維

王縉

裴迪

崔興宗

第十七卷

賀知章

賀蘭進明

李邕

陰行先

李伯魚

趙冬曦

尹丞

崔成甫

李昂

殷遙

徐延壽

苑咸

丘爲

第十八卷

杜甫

李白

第十九卷

崔宗之

敬括

房琯

蘇源明

第二十卷

鄭虔

嚴武

史俊

李適之

祖詠

李頎

綦母潛

趙謙光

李元操

薛令之

張諲

陶翰

顏舒

王珣

薛維翰

崔巨

朱琳

王冷然

萬楚

胡皓

袁瓘

柳識

高力士

高霽

息夫牧

崔曙

第二十一卷

蕭穎士

李華

崔顥

李嘉祐

王翰

第二十二卷

任華

鄒象先

賈至

韋述

裴耀卿

解彥融

儲光羲

孫翊

梁知微

沈千運

魏萬

元結

萬齊融

張均

李嶷

宋鼎 崔頌

第二十三卷

司馬退之 吳筠 蘇廣文 尉遲匡 王諱

陳希烈 高適 張彪 張子容 李之芳

孟浩然 岑參

第二十四卷

元傑 韋迢 孟彥深 郭受 陶峴

張僂 王昌齡 周萬 包融 顏真卿

丁仙芝 李清 韓滉 齊澣 顧朝陽

韋建

第二十五卷

徐安貞 崔惠童 崔敏童 劉晏 劉灣

薛據 劉昫 張巡 張繼 張謂

梁肅

柳渾

孟雲卿

第二十六卷

盧象

閻防

王季友

楊賁

張陵

王之渙

李陽冰

蘇渙

劉長卿

章八元

李穆

韋應物

朱放

孫逖

李紆

畢耀

第二十七卷

于逖

姚係

趙徵明

李泌

褚朝陽

蕭昕

張朝

暢當

暢諸

獨孤及

皇甫冉

皇甫曾

李幼卿

趙驊

賈豳

劉舟

長孫鑄

房白

元晟

劉太沖

姚發

鄭愕

殷少野

鄔載

第二十八卷

張濯

孫叔向

朱長文

胡令能

鄭丹

李希仲

杜誦

鄭錫

古之奇

秦系

令狐峘

楊凌

劉太真

顧况

薛業

劉希戩

朱絳

元凜

楊志堅

劉方平

李揆

戎昱

第二十九卷

常袞

張衆甫

田登

柳郴

李彥遠

薛昇

元載

張元宗

楊郇伯

高拯

梁鐁

劉長川

姚倫

孫處立

劉復

朱彬

戴叔倫

于鵠

王季文

第三十卷

李益

耿湔

盧綸

韓翃

錢起

司空曙

苗發

崔峒

李端

冷朝陽

第三十一卷

竇叔向

竇常

竇牟

竇羣

竇庠

竇鞏

常建

李約

柳中庸

郭鄴

韋處厚

權德輿

張薦

楊於陵

許孟容

崔邠

馮伉

潘孟陽

武少儀

鄭常

鄭轅

韓濬

王濯

張莒

張叔良

第三十二卷

崔琮

李竦

裴達

于尹躬

顏燦

葉季良

陳通方

嚴公弼

嚴公贇

王表

陸贄

楊炎

元季川

蔣渙

包何

劉商

孫海

第三十三卷

李吉甫

武元衡

鄭綯

獨孤良弼

獨狐綬

李季何

李應

盧拱

李觀

裴度

韋同則

陳蛻

第三十四卷

韓愈

張籍

史延

丁澤

樊宗師

李道昌

第三十五卷

陸暢

崔元翰

張建封

皇甫湜

李翱

麴信陵

孟郊

盧仝

劉义

楊巨源

陳羽

王履正

彭伉

辛弘智

歐陽詹

焦郁

袁高

第三十六卷

黎逢

閻濟美

裴交泰

劉阜

第三十七卷

元稹

第三十八卷

白居易

第三十九卷

韋式

崔玄亮

牛僧孺

李紳

沈傳師

盧羣

劉禹錫

封孟紳

陳潤

第四十卷

范傳正

薛存誠

賈島

馬異

張登

包佶

長孫佐輔

李正封

崔護

張又新

陸復禮

柳公權

陸鴻漸

王季則

王公亮

徐牧

陳存

第四十一卷

白行簡

章孝標

施肩吾

鮑溶

孟簡

李程
張蕭遠
許康佐
許堯佐
張南史

朱晝
侯喜
蔣防

第四十二卷

王涯
令狐楚
張仲素

第四十三卷

竇參
郎士元
于良史
舒元興
李諒

李賀
呂溫
呂恭
段洪古
何元上

羊士諤
馮宿
柳宗元
吳武陵
邵貞

崔膺
衛象
李宣遠
熊孺登
崔立之

郭遵
韋紆

第四十四卷

王建

第四十五卷

朱灣

王良會

柳公綽

張正一

徐放

崔備

蘇郁

胡幽貞

張儼

杜頴

韋丹

鄭兪

杜元穎

吳丹

鄭餘慶

趙宗儒

周弘亮

王播

周匡物

許玫

張碧

第四十六卷

劉言史

劉猛

李餘

李涉

劉昭禹

孫昌胤

嚴休復

朱慶餘

劉軻

獨孤鉉

張燦

楊虞卿

楊汝士

張志和

第四十七卷

謝良輔

鮑防

杜奕

丘丹

嚴維

鄭槩

陳元初

呂渭

范燈

樊珣

劉蕃

賈弇

沈仲昌

李祐

李播

蕭靜

崔子向

李逢吉

楊乘

第四十八卷

李泌

韋皋

李德裕

鄭還古

裴航

裴休

呂羣

徐商

韋渠牟

陸長源

盧宗回

劉闢

薛宜僚

陸希聲

崔季卿

皇甫徹

第四十九卷

胡杲

吉皎

劉真

鄭據

盧貞

張渾

白居易

項斯

龐蘊

蔡京

滕邁

郭周藩

殷潛之

裴思謙

何扶

鄭澣

廖有方

薛書記

賈耽

盧貞

姚合

第五十卷

封敖

鄭薰

王軒

宋雍

李摯

韋澳

段文昌

姚向

溫會

李敬伯

姚康

張正元

楊嗣復

炙穀子

楊厚

劉郇伯

王觀

陳上美

侯列

崔樞

陳彥博

郭良驥

崔嘏

李景讓

唐球

第五十一卷

白敏中

魏扶

馬植

崔鉉

殷堯藩

沈亞之

裴夷直

楊敬之

房千里

厲元

喻覺

楊衡

符載

王彥威

繁知一

楊洵美

第五十二卷

雍裕之

裴湊

皇甫曙

李肱

皇甫松

徐凝

張祜

崔涯

盧儲

趙璜

柴夔

王繼勳

夏鴻

曹汾

楊鴻

易重

第五十三卷

喬琳

王鋌

于興宗

李朋

楊牢

李汶儒

薛蒙

李鄴

于瓌

王嚴

劉睽

李渥

劉璐

盧栢

李續

盧求

田章

高瓌

牛徵

蕭祐

魏暮

陸肱

李商隱

劉得仁

第五十四卷

韋表微

羅弘信

高崇文

王智興

劉綺莊

馬戴

孟遲

南卓

鄭顥

李羣玉

溫廷筠

周繇

第五十五卷

周墀 王起 盧肇 丁稜 姚鵠

高退之 孟球 劉耕 裴翻 樊驤

崔軒 蒯希逸 林滋 李宣古 黃頰

張道符 丘上卿 石貫 李潛 孟守

唐思言 戈牢 金厚載 王甚夷

第五十六卷

鄭畋 李彙征 劉威 崔郊 譚銖

郭橐 來鵬 來鵠 鄭宏業 杜牧

許渾 童翰卿 雍陶 周光範 李遠

朱可名 趙嘏 祝元膺 韋承貽 鄭史

韋楚老

第五十七卷

段成式

第五十八卷

溫廷皓

韋蟾

李敬芳

李溟

李郢

韓琮

劉滄

柳棠

賀蘭朋吉

崔珏

李洞

長孫翱

崔魯

曹唐

于武陵

霍總

劉魯風

盧尙卿

第五十九卷

薛瑩

褚載

汪遵

蕭遇

盧渥

李訥

崔元範

楊知至

封彥卿

盧鄴

高湘

盧澥

滕倪

林傑

李明遠

李章武

郭圓

薛逢

張洪靖

韓察

崔恭

崔公信

陸灑

胡證

高銖

張賈

李德裕

第六十卷

李節 費冠卿 劉虛白 蕭建 袁不約

孫緯 周祚 崔澹 盧頻 李廓

李頻 賈馳 薛能 曹鄴 裴虔餘

陳陶

第六十一卷

聶夷中 劉象 紀唐夫 羅紹威 鄭仁表

張林 李搏 裴廷裕 高蟾 宋邕

崔塗 孫郃 鄭準 章碣 于濟

第六十二卷

鄭嵎

第六十三卷

方干 劉駕 王駕 衛準 詹雄

顧非熊 司空圖 秦韜玉 潘誠 胡駢

高駢

潘緯

武瓘

于鄴

路德延

翁承贊

韓垂

第六十四卷

顏萱

李穀

司馬都

鄭璧

崔璞

魏朴

張賁

陸龜蒙

皮日休

崔璐

任蕃

盧休

劉畋

第六十五卷

袁郊

盧延遜

裴說

張爲

韓偓

曹松

杜荀鶴

孫棨

王鐸

鄭紫

胡玢

楊收

平曾

繆島雲

第六十六卷

馮涓

盧嗣立

李質

姚巖傑

王璘

嚴郭

陳標

崔安潛

盧發

錢珣

盧駢

嚴惲

王渙

張曙

翁綬

戴司顏

孫定

趙牧

盧注

鄭愚

王鐔

陳琰

第六十七卷

李璣

袁皓

歐陽澥

徐振

李濤

王貞白

王祝

劉谷

李昌鄴

王滌

李縞

高衢

張綺

韋冰

薛昭緯

鄭合

許畫

程賀

裴劔

張孜

顏雲

李昭象

第六十八卷

殷文圭

唐彥謙

裴澈

盧攜

韋莊

吳融

公乘億

羅鄴

羅袞

第六十九卷

羅虬

羅隱

陸扆

第七十卷

許棠

張喬

劇燕

任濤

張蟻

鄭谷

溫憲

李昌符

王穀

李山甫

伊璠

鍾離權

第七十一卷

張道古

許鼎

李京

胡曾

伍唐珪

韓定辭

蔣貽恭

狄歸昌

李極

高越

許彬

孫蜀

牛嶠

崔庸

同谷子

陳詠

李旭

沈彬

周朴

孫魴

王易簡

范攄之子

鄭雲叟

謝太虛

李嶼

江爲

第七十二卷

僧法宣

僧中寤

僧子蘭

僧靈澈

僧靈一

僧清江

僧廣宣

第七十三卷

僧法振

僧常雅

僧隱求

僧法照

僧冷然

金地藏

僧皎然

僧護國

僧含曦

第七十四卷

僧文秀

僧尙能

僧棲白

僧無可

僧神穎

僧懷濬

僧應物

僧可朋

僧雲表

第七十五卷

僧虛中

僧貫休

僧齊己

殷七七

許碛

許宣平

裴脩然

第七十六卷

僧太易

僧惟審

僧良乂

僧志定

僧栖蟾

僧曇翼

僧清塞

僧無悶

僧文益

僧脩睦

僧景雲

第七十七卷

僧栖一

僧可止

僧卿雲

僧處默

僧澹交

僧若虛

僧隱巒

僧曇域

僧懷楚

僧懷浦

僧慕幽

僧尙顏

僧善生

第七十八卷

開元宮人

楊氏女

薛彥輔母

林氏

崔氏

劉氏

慎氏

薛媛

李季蘭

侯氏

如意中女子

裴柔之

魚玄機

僖宗宮人

張建封妓

宮女

女道士元淳

第七十九卷

張夫人

崔仲容

女郎張琰

女郎崔公達

女郎宋若照

女郎宋若荀 女郎田娥 女郎劉雲 薛濤 女郎葛鵝兒

女郎張文姬 鮑君徽 女郎張窈窕 倡妓常皓 女郎蔣蘊

女郎劉媛 女郎廉氏 彭伉妻 程長文 尼海印

孫氏 鸞鸞 非煙 徐月英

第八十卷

河北人 不知名 僕 新羅王 楊奇鯤

不知名 權龍褒

第八十一卷

毛仙翁

手餘錄

後八字一卷

不眠卷

謝語卷

不眠卷

不眠卷

餘八十卷

蔣刃

翟徽

裴徽

翁日英

文淵隆烈

文淵龍刀

凌尚凌

孫昇文

引齋甲

文淵近文強

鮑孫燭

文淵近文強

孫孫當

文淵神靈

文淵宋善苗

文淵田燧

文淵隆雲

孫燭

文淵葛靈

唐詩紀事卷第一

太宗

高宗

中宗

太宗

帝京篇序云余以萬機之暇遊息藝文觀列代之皇王考當時之行事軒
昊舜禹之上信無閒然矣至於秦皇周穆漢武魏明峻宇雕牆窮侈極麗
征稅殫於宇宙轍跡徧於天下九域無以稱其求江海不能瞻其欲覆亡
顛沛不亦宜乎余追蹤百王之末馳心千載之下慷慨懷古想彼哲人庶
以堯舜之風蕩秦楚之弊用咸英之曲變爛漫之音求之人情不爲難矣
故觀文教於六經閱武功於七德臺榭取其避燥溼金石尙其諸人神皆
節之於中和不係之於淫放故溝洫可悅何必江海之濱乎麟閣可翫何
必兩陵之閒乎忠良可接何必海上神仙乎豐鎬可游何必瑤池之上乎
釋實求華以人從欲亂於大道君子恥之故述帝京篇以明雅志云爾

秦川惟

一作雄

帝宅函谷壯皇居綺殿千尋起離宮百雉餘連薨遙接漢飛

觀迴陵虛雲日隱層闕風煙出綺疏其巖廊罷機務崇文聊駐輦玉匣啓

龍圖金繩披鳥篆章編斷仍續縹帙舒還卷對此乃淹留欵案觀墳典其二

移步出詞林停輿欣載宴瑀弓寫明月駿馬疑流電驚鴈落虛弦啼猿悲

急箭閱賞誠多美於茲乃忘倦其三鳴笳臨樂館眺聽觀芳節急管韻朱絃

清歌凝白雪威鳳肅來下玄鶴紛成列去茲鄭衛聲雅音方可悅其四芳辰

追逸趣禁苑信多奇橋形通漢上峯勢接雲危煙霞交隱映花鳥自參差

何如肆轍跡萬里賞瑤池其五飛蓋去芳園蘭橈遊翠渚萍閒日彩亂荷處

香風舉桂楫滿中川絃歌振長嶼豈獨汾河曲方為歡晏所其六且落雙闕

昏迴輿九重暮長煙散初碧皎月澄輕素褰幌習琴書開軒引雲霧銀漢

耿層閣清風搖玉樹其七懽樂難再逢芳晨良可惜玉酒汎雲疊蘭肴陳綺

席千鍾合堯禹百獸諧金石得志重寸陰忘懷輕尺璧其八建章歡賞夕二

八盡妖妍羅綺昭陽殿芬芳玳瑁筵佩移星正動扇掩月初圓無勞上玄

圃卽此對神仙其九以茲遊觀極悠然獨長想披卷覽前蹤撫躬尋既往望

古茅茨約瞻今蘭殿廣入道慮高危虛心誠盈蕩奉天竭誠敬臨民思惠
養納善察忠諫明科慎刑賞六五誠難繼四三非易仰庶待淳化敷方嗣
云亭響其十帝製帝京篇命李百藥並作既上詔曰卿何身老而才之壯齒
宿而意之新乎

正日臨朝云條風開獻節灰律動初陽百蠻奉遐費萬國朝未央雖無舜
禹跡幸欣天地康車軌同八表書文混四方赫奕儼冠蓋紛綸盛服章羽
旄飛馳道鐘鼓震巖廊組練輝霞色霜戟照朝光晨宵懷至理終愧撫遐
荒

秋日懸清光賜房玄齡詩曰秋露凝高掌朝光上翠微參差麗雙闕輝照
滿重闈仙馭隨輪轉靈鳥帶影飛臨波無定彩入隙有圓暉還當葵藿志
傾葉自相依

賦得白日半西山詩曰紅輪不暫駐鳥飛豈復停岑霞漸漸落溪陰寸寸
生藿葉隨光轉葵心逐照傾晚煙含樹色棲鳥雜流聲

賦得花庭霧詩云蘭氣已薰宮新藥半妝叢色含輕重霧香引去來風拂
樹濃舒碧縈花薄蔽紅還當雜行雨髣髴隱遙空

詠小山詩云近谷交縈藥遙峯對出蓮徑細無全磴松小未含煙

弱柳鳴秋蟬詩云散影玉階柳含翠隱鳴蟬微形藏葉裏亂響出風前
早鴈出雲鳴詩云初秋玉露清早鴈出雲鳴隔雲時亂影因風乍落聲
秋日翠微宮詩云秋光凝翠嶺涼吹肅離宮荷疎一蓋缺樹冷半帷空側
陣移鴻影圓花釘菊叢攄懷俗塵外高眺白雲中

春日望海詩云披襟眺滄海憑軾翫春芳積流橫地軸疏派引天潢仙氣
凝三嶺和風扇八荒拂潮雲布色穿浪日舒光照岸花分彩迷雲鴈斷行
懷卑運深廣持滿守靈長有形非易測無源詎可量洪濤經變野翠鳥屢
成桑之采思漢帝碣石想秦皇霓裳非本意端拱且圖王

召侍臣賜宴守歲云四時運灰琯一夕變冬春送寒餘雪盡迎歲早梅新
洛水云春蒐馳駿骨總轡俯長河霞處流縈錦風前漾卷羅水花翻照樹

隄蘭倒插波豈必汾陰曲秋雲發棹歌

冬日臨昆明池詩云石鯨分玉溜劫燼隱平沙柳影冰無葉梅心凍有花

寒野凝朝露霜天散夕霞歡情猶未極落景遽西斜

賦得浮橋詩云岸曲非千里橋斜異七星暫低逢輦度還高值浪驚水搖

文鷁動纜轉錦花縈遠近隨輪影輕重應人行

入潼關詩云崤函稱地險襟帶壯西京霜峰直臨道冰河曲遶城古木參

差影寒猿斷續聲冠蓋往來合風塵朝夕驚高談先馬度僞曉預鷄鳴棄

繻懷遠志封泥負壯情別有真人氣安知名不名

春日玄武門宴羣臣詩云韶光開令序淑氣動芳年駐輦華林側高宴柏

梁前紫庭文珮滿月墀衰絨連九夷筵瑤席五狄列瓊筵娛賓歌湛露廣

樂奏鈞天盈樽浮綠醕雅曲韻朱絃粵余君萬國還慙撫八埏庶幾保貞

固虛己厲求賢

又置酒坐飛閣詩云高軒臨碧渚飛簷迴架空餘花攢鏤檻殘柳散雕櫳

岸菊初含藥園梨始帶紅卻慮崑山暗還一作不共盡杯中

冬宵各爲四韻詩云雕宮靜龍漏綺閣宴公侯珠簾燭燄動繡柱月光浮
塵起將歌發風停與管適瑣池任多士端展竟何憂

尚書詩云崇文時駐步東觀還停輦輟膳玩三墳輝燈被五典寒心覩肉
林飛魄看沈湎縱情昏主多克已明君鮮滅身資累惡成名由積善既承
百玉來戰競隨歲轉

詠司馬彪續漢志詩云二儀初創象三才乃分位非惟樹司牧固亦垂文
字綿代更膺期芳圖無輟記炎漢承君道英謨纂神器潛龍既可躍術兔
奚難致前史殫妙詞後昆沈雅思書言揚盛跡補闕興洪志川谷猶舊涂
郡國開新意梅山未覺朽穀水誰云異車服隨名表文物因時置鳳戟翼
康衢鑾輿總柔轡清濁必能澄洪纖幸無棄觀儀不失序遵禮方由事政
宣竹律和時平玉條備文囿雕奇彩藝門蘊深致雲飛星共流風揚月兼
至類禋遵令典壇壝資良地五勝竟無違百司誠有庇我皇乘暇景談叢

引衆祕討論窮義府看覈披經笥大辯良難仰小學終先匱聞道諒知榮
含毫孰忘愧

出獵詩云楚王雲夢澤漢帝長楊宮豈若因農暇閱武出轅嵩三驅陳銳
卒七萃列材雄寒野霜氛白平原燒火紅珣戈夏服箭羽騎綠沈弓怖獸
潛幽壑驚禽散翠空長煙晦落景灌木偃嚴風所爲除民瘼非是悅林叢
冬狩詩云烈烈寒風起慘慘飛雲浮霜濃凝廣隰冰厚結清流金鞍多上
苑玉勒騁平疇旌旗四望合置羅一面求楚路爭兕殫秦亡解鹿愁獸忙
投密樹鴻驚起礫洲綺斂原塵靜戈迴嶺日收心非洛汭逸意在渭濱游
禽荒非所樂撫轡更招憂

李詩云玉衡流桂圃成蹊正可尋鷲啼密葉外蝶戲脆花心麗景光朝彩
輕煙上夕陰暫顧暉章側還眺靈山林

賦得櫻桃詩春字韻云華林滿芳景洛陽徧陽春朱顏含遠日翠色影長
津喬柯嚙嬌鳥低枝映美人昔作園中實今來席上珍

春池柳詩云年柳變池臺隨隄曲直迴逐浪絲陰去迎風帶影來踈枝一
鳥弄半翠幾眉開縈雪臨春岸參差閒早梅
臨池柳詩云岸曲絲陰聚波移帶影踈還將眉裏翠來就鏡中舒

臨池竹詩云貞條鄣曲砌翠葉負寒霜拂牖分龍影臨池待鳳翔
詠飲馬詩云駿骨飲長涇奔流灑浴纓細紋連噴聚亂苻遶蹄縈水光鞍
上側馬影溜中橫翻似天池裏騰波龍種生

帝嘗作宮體詩使虞世南賡和世南曰聖作誠工然體非雅正上有所好
下必有甚焉臣恐此詩一傳天下風靡不敢奉詔帝曰朕試卿爾後爲詩
一篇述古興亡既而嘆曰鍾子期死伯牙不復鼓琴朕此詩何所示邪敕
褚遂良卽世南靈座焚之

貞觀六年九月帝幸慶善宮帝生時故宅也因與貴臣宴賦詩起居郎請
平宮商被之管絃命曰功成慶善樂使童子八佾爲九功之舞大宴會與
破陣舞偕奏於庭貞觀二十年秋帝幸靈州破薛延陀時回紇諸部遣使

入貢乞置官司上爲詩序其事曰雪恥酬百王除凶報千古公卿請勒石於靈州從之

高宗

九月九日云端居臨玉宸初律啓金商鳳闕澄秋色龍闈引夕涼野淨山氣斂林疎風露長砌蘭虧半影巖桂發全香滿蓋荷雕翠圓花菊散黃揮鞭爭電烈飛羽亂星光柳空穿石碎弓虛側月張怯猿啼落岫驚雁斷分行斜輪低夕影歸旆引通莊

七夕宴玄圃云羽蓋飛天漢鳳駕越層巒俱歎三秋阻共敘一宵歡璜虧夜月落靨碎曉星殘誰能重操杼纖手濯清瀾又云霓裳轉雲路鳳駕儼天潢虧星凋夜靨殘月落朝璜促歡今夕促長離別後長輕梭聊駐織掩淚獨悲傷

過溫湯詩溫渚停仙蹕豐郊駐曉旌路曲回輪影巖虛傳漏聲暖溜驚湍駛寒空碧霧輕林黃疎葉下野白曙霜明眺聽良無已煙霞斷續生

太子納妃太平公主出降詩云龍樓光曙景魯館啓朝扉豔日濃妝影低
星降婺輝玉庭浮瑞色銀榜藻祥徽雲轉花縈蓋霞飄葉綴旗雕軒迴翠
柏寶駕歸丹殿鳴珠佩繞衣鏤璧輪開扇華冠列綺筵蘭醕申芳宴環階
鳳樂陳玳席珍羞薦蝶舞袖香新歌分落素塵歡凝歡懿戚慶叶慶初姻
暑闌炎氣息涼早吹疏頻方期六合泰共賞萬年春

太平公主武后所生后愛之傾諸女帝擇薛紹尚之假萬年縣爲婚館門
隘不能容翟車有司毀垣以入自興安門設燎相屬道樾爲枯當時羣臣
劉緯之詩云夢梓光青陛穠桃藹紫宮元萬頃云離元應春夕帝子降秋
期任奉古云帝子升青陛王姬降紫宸郭正一云桂宮初服冕蘭掖早升
笄皆納妃出降之意也

中宗

立春日遊苑迎春云神皋福地三秦邑玉臺金闕九仙家寒光猶戀甘泉
樹淑景偏臨建始花彩蝶黃鶯未歌舞梅香柳色已矜誇迎春正啓流霞

席慙囑羲輪勿遽斜

九月九日幸臨渭亭登高作云九日正乘秋三杯興已周泛桂迎罇滿吹

花向酒浮長房萸早熟彭澤菊初收何藉龍沙上方得恣淹留

得秋字

時景

龍三年也御製序云陶潛盈把既浮九醞之歡畢卓持螯須盡一生之興

人題四韻同賦五言其最後成罰之引滿章安石得枝字云金風飄菊藥

玉露泣萸枝蘇瓌得暉字云恩深答効淺留醉奉宸暉李嶠得歡字云令

節三秋晚重陽九日歡蕭至忠得餘字云寵極萸房徧恩深菊酌餘寶希

玠得明字云九辰陪聖膳萬歲奉承明章嗣立得深字云願陪歡樂事長

與歲時深李迥秀得風字云霽雲開晚日仙藻麗秋風趙彥伯得花字云

簪挂丹萸藥杯涵紫菊花楊廉得亭字云遠日瞰秦垌重陽坐灞亭岑羲

得浹字云爰豫矚秦垌升高臨灞浹盧潛用得開字云萸依佩裏發菊向

酒邊開李咸得直字云菊黃迎酒泛松翠淩霜直閣朝隱得筵字云簪笏

趨皇極笙歌接御筵沈佺期得長字云臣歡重九慶日月奉天長薛稷得

歷字云願陪九九辰長奉千千曆蘇頌得時字云年數登高日延齡命賞
時李父得濃字云捧篋萸香遍稱觴菊氣濃馬懷素得酒字云蘭將葉布
席菊用香浮酒陸景初得臣字云登高識漢苑問道侍軒臣章元旦得月
字云雲物開千里天行乘九月李適得高字云禁苑秋光入宸遊霽色高
鄭南金得日字云風起韻虞絃雲開空堯日于經野得樽字云桂筵羅玉
俎菊醴溢芳樽盧懷慎得還字云鶴似聞琴至人疑宴鎬還是宴也章安
石蘇瓌詩先成于經野盧懷慎最後成罰酒

幸秦始皇陵賦詩云眷言君失德驪邑想秦餘政煩方改篆愚俗乃焚書
阿房久已滅閣道遂成墟欲厭東南氣飜傷掩鮑車

十月帝誕辰內殿宴羣臣聯句云潤色鴻業寄賢才帝云叨居右弼媿鹽

梅李嶠運籌帷幄何時來宗楚職掌圖籍濫蓬萊劉憲兩司謬忝謝鍾裴

崔湜禮樂銓管効塵埃鄭愔陳師振旅清九垓趙彥忻承顧問侍天杯李

適銜恩獻壽柏梁臺蘇頌黃縑青簡信康哉盧藏鰕生侍從忝王枚李父

右掖司言實不才

馬懷素

宗伯秩禮天地開

薛稷

帝歌難續仰昭回

宋之

微

臣捧日變寒灰遠慙班左愧遊陪

上官婕妤

帝謂侍臣曰今天下無事朝野多

歡欲與卿等詞人時賦詩宴樂可識朕意不須惜醉大學士李嶠宗楚客

等跪奏曰臣等多幸同遇昌期謬以不才策名文館思勵駑朽庶裨河嶽

既陪天歡不敢不醉此後每遊別殿幸離宮駐蹕芳苑鳴笳仙禁或戚里

宸筵王門香席無不畢從

長寧公主韋庶人所生下嫁楊慎交制曰駙馬都尉楊慎交分榮戚里藉

寵公門恭肅著於立身恪勤効於從政鳳凰樓上宛符琴瑟之歡烏鵲橋

前載協松蘿之契宜分覃茅土式廣山河造第東都府財幾竭又取西京

高士廉第左金吾衛廢營合爲宅作三層樓築山浚池帝及后數臨幸置

酒賦詩羣臣屬和故李嶠長寧公主東莊侍宴詩其末云承恩咸已醉戀

賞未還鑣崔湜云席臨天女貴杯接近臣歡李適云願奉瑤池駕千春侍

德音李乂云地出東郊迴日馭城臨南斗度雲車徐元伯云鳳宸憐簫曲

鸞閨念掌珠公主之生也帝誕日而公主滿月李嶠詩云神龍見象日仙
鳳養雛年大寶來天正明珠對月圓祚延金篋裏歌奏玉箱前今日宜孫
慶還參祝聖篇

登驪山高頂詩云四郊秦漢國八水帝王都閭闔雄里閉城闕壯規模貫
渭稱天邑含岐實奧區金門披玉館因此識黃圖帝自題序末云人題四
韻後罰三杯日暮成者五六人餘皆罰酒

劉憲詩云驪阜鎮皇都鑿遊眺八區原隰旌門裹風雲辰坐隅直城如斗
柄官樹似星榆從臣詞賦未濫得上天衢

蘇頌云仙蹕御層氛高高接翠分巖聲中谷應天語半空聞豐樹連黃道
秦關入紫雲聖圖恢寓縣歌賦小橫汾

武平一云鑾輿上碧天翠帟拖晴煙絕嶠紆仙逕層巖敞御筵雲披丹鳳
闕日下黑龍川更覩南薰奏流聲入管絃

景龍四年正月五日移仗蓬萊宮御大明殿會吐蕃騎馬之戲因重爲柏

梁體聯句帝曰大明御寓臨萬方皇后曰顧慙內政翊陶唐長寧公曰鸞鳴鳳

舞向平陽安樂公曰秦樓魯館沐恩光太平公曰無心爲子輒求郎溫王重曰雄

才七步謝陳王上官昭容曰當熊讓輦愧前芳吏部侍郎崔湜曰再司銓管恩可忘著作

郎鄭棖曰文江學海思濟航考功員外郎武平一曰萬邦考績臣所詳著作郎閻朝隱曰著作不

休出中腸時上疑御史大夫竇從一將作大匠宗晉卿素不屬文未卽令

續二人固請許之從一曰權豪屏跡肅嚴霜晉卿曰鑄鼎開嶽造明堂此

外遺忘時吐蕃舍人明悉獵請令授筆與之曰玉醴由來獻壽觴上大悅

賜與衣服

唐詩紀事卷第二

明皇

德宗

文宗

宣宗

昭宗

軒遊宮十五夜云行邁離秦國巡方赴洛師路逢三五夜春色暗中期關外長河轉宮中淑氣遲歌鐘對明月不減舊遊時

初入秦川路逢寒食詩云洛川芳樹映天津灞岸垂楊罕地新宜爲經過行處樂不知虛度兩京春去年有閨今春早曙色和風着花草可憐寒食與清明光輝併在長安道自從關路入秦川爭到何人不戲鞭公子途中方蹴踘佳人馬上戲鞦韆渭水長橋今欲渡忽忽漸見新豐樹 遠看驢岫入雲霄預想陽池起煙霧煙霧氛氲水殿開慙拂香輪歸去來今歲清明行已晚明年寒食更相陪

早渡蒲關云鐘鼓嚴更曙山河野望通鳴鸞下蒲坂飛旆入秦中地險關逾壯天平鎮尙雄春深津樹合月落成樓空馬色分朝景鷄聲逐曉風所希常道泰非復俟縵同

帝幸蜀西至劔門題詩曰劔閣橫雲峻鑿輿出狩回翠屏千仞合丹嶂五
丁開灌木縈旗轉仙雲拂馬來乘時方在德嗟爾勒銘材至德二年普安
郡守賈深勒石

開元間河南叅軍鄭銑朱陽丞郭仙舟投匭獻詩敕曰觀其文理乃崇道
法至於今時不切事情宜各從所好並罷官度爲道士

裴寬除太原尹帝賦詩餞之曰德比岱雲布心如晉水清

早登太行山中言志云清蹕渡河陽凝笳上太行火龍明鳥道鐵騎遶羊
腸白露霾陰壑丹霞助曉光澗泉含宿凍山草帶餘霜野老茅爲室樵人
薜作裳宣風問耆艾敦俗勸耕桑涼德慙先哲徽猷慕昔皇不因今展義
何必冒垂裳

帝巡省塗次上黨舊宮賦詩序曰朕昔在初九佐貳此州未遇扶搖之力
空俟海沂之詠泊大橫入兆出處斯易一揮寶劔遽履瑤圖承曆數而順
謳謠着天衣而御區夏嗟乎向時沈默駕四馬而朝京師今日逍遙乘六

龍而問風俗爰因巡省途次舊居山川宛然人事無間忽其昇華周遊館宇觸目依然雖迹異漢皇而地如豐邑擊筑慷慨酌杯留連空想大風題茲短什詩云

三千初擊浪九萬欲搏空天地猶驚否陰陽始遇蒙存貞斯歷試佐貳佇昭融多謝時康理良慙寶劔功長懷問鼎氣夙負拔山雄不學劉崑舞先歌漢祖風英髦既包括豪傑自牢籠人事一朝異謳謠四海同如何昔朱邸今此作離宮鴈沼澄瀾翠猿嵒落照紅小山秋桂馥長坂舊蘭蕙卽是淹留處乘歡樂未窮

答張說出雀鼠谷云雷出膺乾象風行順國人川途猶在晉車馬漸歸秦背陝關山險橫汾鼓吹頻草依陽谷變花待北嵒春聞有鷓鴣客清詞雅調新求音思欲報心迹竟難陳

送張說巡邊云端拱復垂裳長懷御遠方股肱申教義戈劔靜要荒命將綏邊服雄圖出廟堂三台入武帳八座起文昌寶胄匡韓主華宗輔漢王

茂先慙博物平子謝文章盡節恢時佐輸誠禦寇場三軍臨朔野駟馬即
戎行鼓吹威夷狄旌軒溢洛陽雲臺先著美今日更貽芳

送張說集賢上學士云廣學開書殿崇儒引席珍集賢招袞職論道命台
臣禮樂泯今古文章革舊新獻酬俎列賓主位班陳節變雲初夏時移
氣尙春所希光史策千載仰茲晨

左丞相說右丞相璟太子少傅乾曜同上官命讌東堂賜詩云赤帝收三
傑黃軒舉二臣由來丞相重分掌國之鈞我有握中璧雙飛席上珍子房
推要道仲子訝風神復輟台衡老將爲調護人鵷鸞同拜日車騎擁行塵
樂聚南宮宴觴連北斗醇俾子成百揆垂拱問彝倫

同二相已下羣臣宴樂遊園賜詩云撰日宮廊暖需雲宴樂初萬方朝玉
帛千品會簪裾地入南山遠城分北斗餘林塘垂柳密原隰野花踈帟幕
看逾暗歌鐘聽自虛興闌歸騎轉還奏弼違書二相謂張宋也

千秋節賜羣臣鏡詩云臺上冰花澈窗中月影臨更銜長壽帶留意感人

深是日賜宴詩云月銜花綬鏡露綴綵絲囊張說應制云珠囊含瑞露金鏡抱僊輪

開元十六年帝自擇廷臣爲諸州刺史許景先治虢州源光裕鄭州寇泚宋州鄭溫琦邠州袁仁恭杭州崔志廉襄州李昇期邢州鄭放定州蔣挺湖州裴觀滄州崔誠遂州凡十一人行詔宰相諸王御史以上祖道洛濱盛具奏太常樂帛舫水嬉命高力士賜詩令題座右帝親書且給筆紙令自賦賚絹三千遣之帝詩云

眷言思共理鑑寢想惟良猗歎此推擇聲績著周行賢能旣俟進黎獻實佇康視人當如子愛人亦如傷講學試誦論阡陌勸耕桑虛譽不可飾清知不可忘求名迹易見安直德自彰獄訟必以情教民貴有常恤惇且存老撫弱復綏強勉哉各祇命知予眷萬方

帝爲趙法師別造精院過院賦詩并序云秋九月聽政觀風存乎遊息退朝之後歷西上陽入清虛院則法師所居之地也法師得玄元之法養浩

然之氣故法此僊家特建真宇紫房對聳綠竹羅生既親重其人每經過
其地以怡神洗雪進德脩業何必齋心累月遠在順風因而賦詩用適真
意云爾詩云

宗師心物外爲道運虛舟不戀巖泉賞來從宮禁遊探玄知幾歲習靜更
宜秋煙樹辨朝色風湍聞夜流坐朝繁聽覽尋勝在清幽欲廣無爲化因
茲庶可求

又送趙法師還蜀因名山奠簡詩云道家奠靈簡自昔仰神仙真子今將

命蒼生福可傳江山尋故國城郭信依然二室遙相望雲迴洞裏天

法師
觀字

在今蜀州
新津縣也

天寶十六年又送忠州太守康昭遠等詩云端拱臨中樞緬懷共予理不
惟臺閣英孰振循良美分符侯甸內拜首明庭裏誓節期飲冰調人方導
水嘉聲馳九牧惠化光千祀時雨侔昔賢芳猷貫前史佇爾頌中和吾將

令卿士

德宗

元日退朝觀軍仗歸營云獻歲視元朔萬方咸在庭端旒指羣后廻輦閱
師貞綵仗宿華殿退朝歸禁營分行左右出轉旆風雲生歷歷趨複道容
容映層城勇餘矜捷技令肅無喧聲眷此戎旅節載嘉良工誠順時傾宴
賞亦以助文經

中和節日宴百寮賜詩云韶華啓仲序初吉諧良辰肇茲中和節式慶天
地春歡酣朝野同生德區宇均雲開灑膏露草䟽芳河津歲華方載陽東
作方肆勤慙非薰風唱曷用慰吾人

中和節賜百官讌集因示所懷云至化常在宥保和茲息人推誠撫諸夏
與物長爲春仲月風景暖禁城花柳新芳時協金奏錫燕周羣臣絲竹豈
云樂忠賢唯所親庶洽朝野意曠然天下均

帝移晦日爲中和節故呂渭詩云皇心不向晦改節號中和淑氣同風景
佳名自詠歌湔裙移舊俗賜尺下新科曆象千年正醑釀四海多正元八

年試宏詞詩以中和節應詔

重陽日卽事云令節曉澄霽四郊煙靄空天青白露潔菊散黃金叢寡德
荷天貺順時休百工豈懷歌鐘樂思爲君臣同至化在亭育相成資始終
未知康衢詠所仰惟年豐

豐年多慶九日示懷云爽氣肅時令早衣聞朔鴻重陽有佳節具物欣年
豐皎潔暮潭色芬敷新菊叢芳罇滿衢室繁吹凝煙空惠合信吾道保和
惟爾同推誠至玄化天下期爲公

九日絕句云禁苑秋來爽氣多昆明風動起滄波中流簫鼓誠堪賞詎假
橫汾發棹歌

重陽中外同權餘字韻羣臣亦以其韻奉和故權德輿云宸衷在化成藻
思煥瓊琚微臣侍竊抃豈足歌唐虞

又重陽卽事豐年多慶二詩以同字韻亦依以奉和故德輿前章云天道
光下濟睿詞敷大中後章云澤均行葦厚年慶華黍豐武元衡前章云重

陽德澤振萬國歡娛同後章云賡歌禹功盛擊壤堯年豐九奏碧霄裏千
官皇澤中

重陽日中外同歡以詩言志因示羣官云爽節在重九物華新雨餘清秋
黃葉下菊散金潭初萬實行就稔百工欣所如歡心暢遐邇殊俗同車書
至化自敦睦佳辰宜宴胥鏘鏘間絲竹濟濟羅簪裾此樂匪足耽此誠期
永孚

七月十五日題章敬寺云招提邇皇邑複道連重城法筵會早秋駕言訪
禪扃嘗聞大仙教清淨宗無生七物匪吾寶萬行先求成名相既雙寂繁
華奚所榮金風扇微涼遠烟凝翠晶松院靜苔色竹房深磬聲境幽真慮
恬道勝外物輕意適本非說含毫空復情

正元七年

正元五年初置中和節帝製詩寫本賜戴叔倫於容州詩云東風變梅柳
萬彙生春光中和紀月令方與天地長耽樂豈予尙懿茲時景良庶遂亭
育恩同致寰海康君臣永終始交泰符陰陽曲沼水新碧華林桃稍芳勝

賞信多歡戒之在無荒

送徐州張建封還鎮云牧守寄所重才賢生爲時宣風自淮甸授鉞膺藩
維入覲展遐戀臨軒慰來思忠誠在方寸感激陳情詞報國爾所尙恤人
予是資歡宴不盡懷車馬當還期穀雨將應候行春猶未遲勿以千里遙

而云無已知

正元後藩帥入朝
獨建封獲賜詩

帝善爲文尤長於篇什每與學士言詩於浴堂殿夜分不寐正元中昭義
節度李抱真薦貝州宋庭芬之女若昭召入禁中試文帝咨美帝每與侍
臣賡和若昭姊若莘等五人皆預呼學士

正元四年九月賜宴曲江亭帝爲詩序曰朕在位僅將十載實賴忠賢左
右克致小康是以擇三令節錫茲宴賞俾大夫卿士得同歡洽也夫共其
戚者同其休有其初者貴其終咨爾羣寮順朕不暇樂而能節職思其憂
咸若時則庶乎理矣因重陽之會聊示所懷詩云

早衣對庭燎躬化勤意誠時此萬機暇適與佳節并曲池潔寒流芳菊舒

金英乾坤爽氣澄臺殿秋光清朝野慶年豐高會多歡聲永懷無荒誠良
事同期情因詔曰卿等重陽會宴朕想歡洽欣慰良多情發于中因製詩
序令賜卿等一本可中書門下簡定文詞士三五十人應制同用清字明
日內於延英門進來宰臣李泌等雖奉詔簡擇難於取捨由是百寮皆和
上自考其詩以劉太真及李紆等四人爲上等鮑防于邵等四人爲次等
張蒙殷亮等二十三人爲下等而李晟馬燧李泌三宰相之詩不加考第
帝章敬寺詩松院淨苔色竹房深磬聲時人傳誦帝晚年工詩句臣下莫
及每御製奉和退而笑曰排工俗有投石之戲兩頭置標號曰排公以中
不中爲勝負也杜太保在淮南進崔叔靖詩一百篇帝曰此惡詩何用進
時云奉勅惡詩

韋綬以內相感心疾罷還第帝九日作黃菊歌顧左右曰安可不示韋綬
遣使持往綬遽奉和附使進帝曰爲文不已豈頤養耶敕曰自今勿復爾

文宗

上元日詩云上元高會集羣仙心齋何事欲祈年丹誠儻徹玉帝座且共
吾人慶大田

又云冀生三五葉初齊上元羽客出桃蹊不愛仙家登真訣願蒙四海福
黔黎

裴度拜中書令以疾未任朝謝上巳曲江賜宴羣臣賦詩帝遣中使賜度
詩曰注想待元老識君恨不早我家柱石衰憂來學丘禱仍賜御札曰朕
詩集中欲得見卿唱和詩故令示此卿疾未差可異日進來御札及門而
度薨

常謂左右曰若不甲夜視事乙夜觀書則何以爲人君耶每試進士多自
出題目及所司進所試披覽吟詠終日忘倦常延學士於內庭討論經義
較量古今令宮女以下侍茶湯飲饌李訓講周易時方盛夏遂命取水玉
腰帶辟暑犀如意以賜訓曰如意足以與卿爲談柄也讀高郢無聲樂賦
白居易求玄珠賦謂之玄祖

帝聽政暇博覽羣書一日延英顧問宰臣詩云呦呦鹿鳴食野之苹苹是何草時宰相楊珣楊嗣復陳夷行相顧未對珣曰臣按爾雅苹是籟蕭上曰朕看毛詩疏葉圓而花白蒼生野中似非籟蕭

又一日問宰臣古詩云輕衫襯跳脫跳脫是何物宰臣未對上曰即今之腕釧也真誥言安妃有斲粟金跳脫是臂飾

帝好五言自制品格多同肅代而古調清峻嘗欲置詩博士貞穆李公曰陛下遠慕堯舜而置詩博士况詩人多輕昧於識理今翰林學士皆能文詞而古今篇什足可怡悅聖情帝乃止

李公珣也

甘露事後帝不樂往往瞠目獨語云須殺此輩令我君臣間絕後賦詩曰輦路生春草上林花滿枝憑高無限意無復侍臣知翌日觀牡丹誦賦吟罷始憶舒元興之詞歎息泣下因命作樂聊自適宮人沈翹翹者歌河滿子有浮雲蔽白日之句其聲宛轉上因歛歛問曰汝知之耶此文選古詩第一首蓋忠臣爲姦邪所蔽也乃賜金臂環問其從來則吳元濟女也自

陷掖廷易姓沈氏配樂籍又奏曰妾本藝方響迺白玉也搥則響犀爲之
願賜臣妾帝命賜之既至命奏涼州之曲音韻清越聽者無不凄然嘗詔
開元霓裳羽衣舞參以雲韶肄于廷太常少卿馮定部諸工立篋間端凝
若植問李珣珣以定對帝喜曰豈非能古章句者邪親誦定送客西江詩
召升殿賜禁中瑞錦詔悉所著以上嘗與宰相論詩之工拙鄭覃曰詩之
工者無若三百篇皆國人作之以刺美時政王者采之以觀風俗耳不聞
王者爲詩也後代辭人之詩華而不實無補於事陳後主隋煬帝皆工於
詩不免亡國陛下何取焉覃篤於經術上甚重之

常吟杜甫曲江篇云江頭宮殿鎖千門細柳新蒲爲誰綠乃知天寶以前
樓臺之盛鄭注乃命神策軍淘曲江昆明二池許公卿立亭館兩軍造紫
雲樓彩霞亭內出樓額賜之

宣宗

宣宗十二年前進士陳玩等三人應博學宏辭選所司考定名第及詩賦

論進訖上於延英殿詔中書舍人李藩等對上曰凡考試之中重用字如何中書對曰賦卽偏枯駁雜論卽褒貶是非詩卽緣題落韻只如白雲起封中詩云封中白雲起是也其間重用文字乃是庶幾亦非常有例也又曰孰詩重用字對曰錢起湘靈鼓瑟詩有二不字上曰善撫雲和瑟常聞帝子靈馮夷空自舞楚客不堪聽逸韻諧金石清音發杳冥蒼梧來怨慕白芷動芳馨流水傳湘浦悲風過洞庭曲終人不見江上數峯青

上覽錢公此年宏詞詩曰且一種用文字此詩似不及起起則今之協律文字也合於匏革宮商卽變鄭衛之奏雖謝眺云洞庭張樂夜瀟湘帝子遊雲去蒼梧野水還江漢流未若此鼓瑟一篇摛藻妍華無以加其前進士宏詞詩重字者登科更待明年考校起詩便付吏選

帝好進士及第每對朝臣問及第苟有科名對者必大喜便問所試詩賦題目并主司姓名或佳人物偶不中第必歎惜移時嘗於內自題鄉貢進士李道龍

白居易之死帝以詩弔之曰綴玉聯珠六十年誰教冥路作詩仙浮雲不繫名居易造化無爲字樂天童子解吟長恨曲胡兒能唱琵琶篇文章已滿行人耳一度思卿一愴然帝製秦邊陲曲其詞云海岳咸通及帝垂拱而年號咸通焉庶子裴惲進詩賀聖政有太康字帝怒曰太康失邦乃以比我戶部韋澳奏云晉平吳寇改號太康雖有失邦之言乃見歸美之文上曰天子大須博覽不然幾錯罪惲

舊製盛春內殿賜宴三日帝妙音律每先裁製新曲俾禁中女伶迭相教授至是出宮女數百分行連袂而歌其曲有曰播皇猷者率高冠方履褒衣博帶趨走俯仰皆合規矩于然有唐堯之風焉有曰葱女踏歌隊者率言葱嶺之士樂河湟故地歸國復爲唐民也若霓裳曲者皆執節幡被羽服態度凝澹飄飄然有翔雲舞鶴見左右如是數十曲流傳民間

出令狐澄

正陵遺事

昭宗

陝府唐昭宗有詩云安得有英雄迎歸大內中或曰逍遙樓有太宗詩云
昔乘匹馬去今驅萬乘來志意不侔矣乾寧三年李茂貞犯闕帝次華州
韓建迎歸郡中帝鬱鬱不樂每登城西齊雲樓遠望明年秋制菩薩蠻二
首云登樓遙憶秦宮殿茫茫只見雙飛燕渭水一條流千山與萬丘遠煙
籠碧樹陌上行人去何處是英雄迎奴歸故宮又一日飄飄且在三峰下
秋風往往堪霑灑腸斷憶仙宮朦朧煙霧中思夢時時睡不語長如醉早
晚是歸期蒼穹知不知

帝戊午年還京庚申歲劉季述爲變冊德王帝明年正月一日返正改元
天復十一月朱全忠領兵入河中四日冬節帝又爲鳳翔兵士擁幸岐城
帝在城中忽一旦大雷雨牛馬震死街西古槐殿東鴟吻立碎帝爲詩曰
只解劈牛兼劈樹不能誅惡復誅兇朱全忠迎駕圍逼首涉三載癸亥正
月駕幸全忠軍乃還京甲子歲全忠遣寇彥卿逼幸洛四月改元天祐帝
在洛嘗曰訖于山頭凍死雀何不飛去生處樂

唐詩紀事卷第三

武后

徐賢妃

上官昭容

越王貞

韓王元嘉

孔紹安

鄭世翼

董思恭

何仲誼

沈叔安

陸敬

袁朗

牛鳳及

朱子奢

庾抱

張文恭

陳叔達

薛收

武后

天授二年臘卿相欲詐稱花發請幸上苑有所謀也許之尋疑有異圖乃遣使宣詔曰明朝遊上苑火急報春知花須連夜發莫待曉風吹於是凌晨名花布苑羣臣咸服其異后託術以移唐祚此皆妖妄不足信也大凡后之詩文元皆萬頃崔融輩爲之

同太平公主遊九龍潭則天御製云山窻遊玉女澗戶對瓊峰巖頂翔雙鳳潭心倒九龍酒中浮竹葉杯上寫芙蓉故驗山家賞唯有入松風萬歲通天元年鑄九鼎成置于東都明堂之庭后自製曳鼎歌令曳者唱

和焉開元二年太子賓客薛謙光獻東都九鼎銘其蔡州鼎銘武后所制
文曰犧農首出軒昊膺期唐虞繼踵湯禹乘時天下光宅域內雍熙上玄
降鑒方建隆基紫微令姚元崇奏曰聖人啓運休兆必彰請宣付史館

明皇

御名已
兆於此

徐賢妃

秋風函谷應詔云秋風起函谷勁氣動河山偃松千嶺上離雨二陵間低
雲愁廣隰落日慘潼關此時飄紫氣應驗真人還

長安崇聖寺有賢妃粧殿太宗曾召妃久不至怒之因進詩曰朝來臨鏡
臺粧罷暫徘徊千金始一笑一召詎能來

正觀二十三年上疏諫太宗息兵罷役其略曰大業者易驕願陛下難之
善始者難終願陛下易之又曰漆器非延叛之方桀造之而人叛玉杯豈
招亡之術紂用之而國亡侈麗之源不可不遏作法於儉猶恐其奢作法
於奢何以制後

賢妃名惠湖州人生五月能言四歲通論語八歲曉屬文父孝德嘗試使擬離騷爲小山篇曰仰幽巖而流盼撫桂枝以凝想將千齡兮此遇荃何爲兮獨往孝德大驚知不可掩於是所論著遂傳太宗知之召爲才人遷充容永徽元年卒贈賢妃弟齊聃子堅皆以學名

上官昭容

綵書怨云葉下洞庭初思君萬里餘露濃香被冷月落錦屏虛欲奏江南曲貪封薊北書書中無別意唯悵久離居

九月九日上幸慈恩寺登浮圖羣臣上菊花壽酒賦詩婕妤獻詩云帝里重陽節香園萬乘來却邪萸入佩獻壽菊傳杯塔類承天湧門疑待佛開睿詞懸日月長得御昭回

十月駕幸三會寺婕妤獻詩云釋子談經處軒臣刻字留故臺宜老識殘簡聖皇求駐驛懷千古開襟望九州四山緣塞合二水夾城流宸翰陪瞻仰天杯接獻酬太平詞藻盛長願託鴻休

中宗立春日遊苑迎春昭容應制云密葉因裁吐新花逐剪舒攀條雖不
謬摘藥詎知虛春至由來發秋還未肯踈借問桃將李相亂欲何如

長寧公主流杯池六首

玉環騰遠創金埒荷殊榮弗玩珠璣飾仍留仁智情鑿山便作室憑樹即
爲楹公輸與班爾從此遂韜聲

其一

登山一長望正遇九春初結駟填街術閭闔滿邑居鬪雪梅先吐驚風柳
未舒直愁斜日落不畏酒樽虛

其二

霽曉氣清和披襟賞薜蘿玳瑁凝春色琉璃漾水波跂石聊長嘯攀松乍
短歌除非物外者誰就此經過

其三

暫爾遊山第淹留惜未歸霞牕明月滿澗戶白雲飛書引藤爲架人將薜
作衣此真攀翫所臨睨賞光暉

其四

放曠出煙雲蕭條自不羣漱流清意府隱几避囂氛石畫裝苔色風梭織

木文山室何爲貴唯餘蘭桂薰

其五

策杖臨霞岫危步下霜蹊志逐深山靜途隨曲澗迷漸覺心神逸俄看雲霧低莫恠人題樹祇爲賞幽棲 其六

七言 沁水田園先自多齊城樓觀更無過倩語張騫莫辛苦人今從此識

天河 其一

參差碧岫聳蓮花潺湲綠水瑩金沙何須遠訪三山路人今已到九仙家

其二

憑高瞰迥足怡心菌閣桃源不暇尋餘雪依林成玉樹殘雲點岫即瑤岑

其三

五言 攀藤招逸客偃桂叶幽情水中看樹影風裏聽松聲 其一

携琴待叔夜負局訪安期不應題石壁爲記賞山時 其二

泉石多仙趣巖壑寫奇形欲知堪悅耳唯聽水泠泠 其三

巖壑恣登臨瑩目復怡心風篁類長笛流水當鳴琴 其四

懶步天台路惟登地肺山幽巖仙桂滿今日恣情攀 其五

暫遊仁智所蕭然松桂情寄言棲遁客勿復訪蓬瀛其六

瀑溜晴疑雨叢篁晝似昏山中真可翫暫請報王孫其七

傍池聊試筆倚石旋題詩預彈山水調終擬從鍾期其八

橫鋪豹皮褥側戴鹿胎巾借問何爲者山中有逸人其九

四言檀欒竹影颺颺松聲不煩歌吹自足娛情其一

仰循茅宇俯眄喬枝煙霞問訊風月相知其二

枝條鬱鬱文質彬彬山林作伴松桂爲隣其三

清波洶湧碧樹冥蒙莫恠留步因攀桂叢其四

莫論圓嶠休說方壺何如魯館卽是仙都其五

三言逐仙賞展幽情喻崐閩邁蓬瀛其一

遊魯館陟秦臺汧山壁愧瓊瓌其二

張說作昭容文集序云古者有女史記功書過有女尙書決事宮閣昭容

兩朝專美一日萬機顧問不遺應接如響雖漢稱班媛晉譽左嬪文章之

道不殊輔佐之功則異迹秘九天之上身沒重泉之下嘉猷令範代罕得
聞庶幾後學嗚呼何仰然則大君據四海之圖懸百靈之命喜則九圍挾
纘怒則千里流血靜則黔黎乂安動則蒼眈罷弊入耳之語諒其難乎貴
而勢大者疑賤而禮絕者隔近而言輕者忽遠而意忠者忤惟窈窕柔曼
誘掖善心忘味九得之衢傾情六藝之圃故登岷巡海之意寢剪胡刈越
之威息璿臺珍服之態消從禽嗜樂之端廢獨使溫柔之教漸於生人風
雅之聲流於來葉非夫元黃毓粹正明助思衆妙扶識羣靈挾志誕異人
之寶授興王之瑞其孰能臻斯懿乎鎮國太平公主道高帝妹才重天人
昔嘗共遊東辟同宴北渚倏來忽往物在人亡憫雕琯之殘言悲素扇之
空曲上聞天子求椒房之故事有命史臣叙蘭亭之新集

中宗正月晦日幸昆明池賦詩羣臣應制百餘篇帳殿前結綵樓命昭容
選一首爲新翻御製曲從臣悉集其下須臾紙落如飛各認其名而懷之
既進唯沈宋二詩不下又移時一紙飛墜競取而觀乃沈詩也及聞其評

曰二詩工力悉敵沈詩落句云微臣彫朽質羞覩豫章材蓋詞氣已竭宋詩云不愁明月盡自有夜珠來猶陟健舉沈乃伏不敢復爭宋之問詩曰春豫靈池近滄波帳殿開舟凌石鯨動查拂斗牛迴節晦莫全落春遲柳暗催象溟看浴景燒劫辨沉灰鎬飲周文樂汾歌漢武才不愁明月盡自有夜珠來

昭容名婉兒西臺侍郎儀之孫父廷芝與儀死武后時母鄭方妊夢巨人舁大秤曰持此稱量天下昭容生踰月每戲曰稱量者豈爾耶輒啞然應後內秉機政符其夢云自通天以來內掌詔命中宗立進拜昭容帝引名儒賜宴賦詩婉兒常代帝及后長寧安樂二公主衆篇並作而采麗益新又差第羣臣所賦賜金爵故朝廷靡然成風當時屬辭大抵浮靡然皆有可觀昭容力也韋后之敗斬闕下

中宗幸溫湯獻三絕句云三冬季月景龍年萬乘觀風出灞川遙看電躍龍爲馬迥矚霜原玉作田

鸞旗掣曳拂雲迴羽騎驂驔躡景來隱隱驪山雲外聳迢迢御帳日邊開
翠幕朱帷敞月營金疊玉罽泛蘭英歲歲年年常扈蹕長長久久樂承平
正元十四年崔仁亮於東都買得研神記一卷有昭容列名書縫處呂溫
感歎因賦上官昭容書樓歌云漢家婕妤唐昭容上詩能賦千載同自言
才藝是天真不服丈夫勝婦人歌闌舞罷閑無事縱恣優游弄文字玉樓
寶架中天居絨奇秘異萬卷餘水精編帙綠鈿軸雲母擣紙黃金書風飄
花露清旭時綺窓高挂紅綃帷香囊盛煙繡結絡翠羽拂案青琉璃吟披
嘯卷紛無已皎皎淵機破研理詞縈綵翰紫鸞迴思耿寥天碧雲起碧雲
起心悠哉境深轉苦坐自催金梯珠履聲一斷瑤階日夜生青苔青苔祕
仙關曾比羣玉山神仙杳何許遺逸滿人間君不見洛陽南市賣書肆有
人買得研神記紙上香多蠹不成昭容題處猶分明令人惆悵難爲情
高宗後苑雙頭牡丹昭容詩云勢如連璧友心似臭蘭人

越王貞

和過溫湯詩鳳輦騰宸駕驪籞次乾遊坎德疎溫液山隈派暖流寒氛空
外擁蒸氣沼中浮林凋帷影散雲斂蓋陰收霜郊暢玄覽參差落景迺
貞善騎射涉文史有吏幹爲宗室材王中宗廢居房陵貞爲豫州刺史垂
拱四年八月起兵圖反正事兵敗及禍

韓王元嘉

奉和同太子監守違戀詩云乾象開層屋離明啓少陽卜征從獻吉守器
屬元良逖矣凌周誦遙哉掩漢莊好士傾南洛多才盛北場地分丹鷲嶺
途間白雲鄉儲誠爰曉夕宸愛積炎涼珠璧連霄漢萬物仰重光
元嘉高祖子垂拱中刺絳州與越王子冲圖舉兵冲敗元嘉至京師謀泄
后逼令自殺孟利正嘗稱其文曰劉隣之周思茂不過也

孔紹安

石榴詩可惜庭中樹移根逐漢臣只爲時來晚開花不及春

詠天桃云結葉還臨影飛香欲徧空不意餘花落翻沉露井中

紹安大業末爲監察御史高祖爲隋討賊河東紹安監其軍深見接遇高祖受禪紹安自洛陽間行來奔高祖大悅拜內史舍人時夏侯端亦嘗爲御史先來歸紹安授祕書監因侍宴詠石榴有祇爲時來晚開花不及春之句武德中令狐德棻欲補正歷代史記各差官主修一代紹安以中書舍人與崔善爲蕭德言主梁多歷年不能就皆罷之紹安在隋時與孫萬壽以文辭稱時謂孫孔

紹安贈蔡君詩云疇昔同幽谷伊爾遷喬木赫奕盛青紫討論窮簡牘賦結客少年場云結客佩吳鈎橫行度隴頭雁在弓前落雲從陣後浮吳師驚燧象燕將警奔牛轉蓬飛不息冰河結未流若使三邊定當封萬戶侯

鄭世翼

過嚴君平古井詩云嚴平本高尚遠蹈古人風賣卜成都市流名大漢中舊井改人世寒泉久不通年多旣罷汲無禽乃遂空如何屬秋氣唯有雙

井桐

看新婚詩云初筭夢桃李新粧應標梅疑逐朝雲去翻隨暮雨來雜珮含風響叢花隔扇開姮娥對此夕何用久徘徊

登北邙還至京洛詩云步登北邙阪踟躕聊寫望宛洛盛皇居規模窮大壯三河分設險兩嶠資巨防飛觀紫煙中層臺碧雲上青槐夾馳道迢迢脩且曠左右多第宅參差居將相清晨謁帝返車馬相追訪胥徒各異流文物紛殊狀囂塵暗天起簫管從風颺伊余忠且直生平獨淪喪山幽有桂叢何爲坐惆悵

世翼滎陽人武德時爲揚州錄事參軍數以言忤物有崔信明者嘗矜其文謂過李百藥世翼遇之江中謂曰聞公有楓落吳江冷願見其餘信明欣然多出衆篇世翼覽未終曰所見不逮所聞投諸水引舟去正觀時坐怨謗流死嵩州

世翼巫山高云巫山凌太清岩嶠類削成霏霏暮雨合靄靄朝雲生危峰

入鳥道深谷寫猿聲別有幽棲客淹留攀桂情

董思恭

星詩云歷歷東井舍昭昭右掖垣雲際龍文出池中鳥色翻流暉下月路
墮影入河源方知潁川集別有太丘門

雪詩云天山飛雪度言是落花朝惜哉不我與蕭索健風飄鮮潔凌紈素
紛糝下枝條良書竟何在坐見容華銷

虹詩云春暮萍生早日落雨飛餘橫彩分長漢倒色媚清渠梁前朝影出
橋上晚光舒願逐旌旗轉飄飄侍直廬

霧詩云蒼山寂已暮翠觀黯將沉終南晨豹隱巫峽夜猿吟天寒氣不歇
景晦色方深侍訪公超市將予赴華陰

詠日云滄海十枝暉玄圃重輪慶華發晨檻凌彩翻朝鏡忽遇驚風飄
自有浮雲映更也人皆仰無待揮戈正

昭君怨云琵琶馬上彈行路曲中難漢月正南遠燕山直北寒髻環風拂

破眉黛雪沾殘斟酌紅顏改徒勞握鏡看

詠月云北堂未安寢西園聊騁望玉戶照羅幃珠軒明綺幃別客長安道
思婦高樓上所願君莫遺清風時可訪

野郊愴新別河橋非舊餞慘日映峰沉愁雲隨蓋轉哀笳時斷續悲旌乍
舒卷望望情何極浪浪淚空泣無復昔時人芳春共誰遣

詠琵琶云半月無雙影金花有四時權藏千里態掩抑幾重悲促節繁紅
袖清音滿翠帷駛彈風響急緩曲鈎聲遲空餘關隴恨因此代相思

詠弓詩云上弦明月半激箭流星遠落雁帶書驚啼猿映枝轉

詠桃詩云禁苑春光麗花蹊幾樹裝綴條深淺色點露參差光向日分千
笑迎風共一香如何仙嶺側獨秀隱遙芳

詠李詩云盤根植瀛渚交榦橫倚天舒華光四海卷葉蔭三川

守歲詩云暮景斜芳殿年華麗綺宮寒辭去冬雪暖帶入春風階馥舒梅
素盤花卷燭紅共歡新故歲迎送一霄中

又云歲陰窮暮紀獻節啓新芳冬盡今宵促年開明日長冰銷出鏡水梅
散入風香對此歡終宴傾壺待曙光

思恭高宗時中書舍人同撰瑤山玉彩

何仲誼

七夕賦詠成篇云日日思歸勤理鬢朝朝佇望懶調梭凌風寶扇遙臨月
映水仙車遠渡河歷歷珠星疑拖珮冉冉雲衣似曳羅通宵道意終無盡
向曉離愁已復多

仲誼武德正觀間人也

沈叔安

七夕賦詠成篇云皎皎霄月麗秋光耿耿天津橫復長停梭且復留殘緯
拂鏡及早更新粧彩鳳齊駕初成輦凋鵲填河已作梁雖喜得同今夜枕
還愁重空明日牀

南部新書云武德七年遣刑部尙書沈叔安携天尊像賜高麗後爲潭州

都督圖形凌煙閣

陸敬

七夕詩云夙駕鳴鑿啓闔闔霓裳遙裔儼天津五明霜紈開羽扇百和香
車動畫輪婉變夜分能幾許靚粧冶服爲誰新片時歡娛自有極已復長
望隔年人

敬有集十四卷高祖時人也初爲竇建德國子祭酒秦王軍武牢建德軍
迫於武牢不得進敬說令取懷州踰太行入上黨趨壺口駭蒲津乘唐國
之虛以取山北建德不從以及於敗其僞官屬皆降唐

袁朗

秋日應詔詩云玉樹涼風舉金塘細草萎葉落商飈觀鴻歸明月池迎寒
桂酒熟含霧菊花垂一奉章臺宴千秋長願斯

朗父樞仕陳爲德教殿學士陳亡入隋唐初朗爲秦王府文學太宗時爲
給事中卒帝曰朗任淺而性謹厚使人悼惜

賦飲馬長城窟云朔風動秋草清蹕長安道長安運不窮所以隔華戎規
模唯聖作荷負曉成功鳥庭已向內龍荒更鑿空玉關塵卷靜金徽路已
通湯征隨北怨舜詠起南風盡野功初立綏邊事云集朝服踐狼居凱歌
旋馬邑山響傳鳳吹霜華藻瓊鋤屬國旄節歸單于歛關入日落寒風起
驚河被原隰零落葉已寒河流清且急四時徭役靜千載干戈戢太平今
若斯汗馬意無施唯當事筆硯歸去草封禪

牛鳳及

奉和受圖溫洛詩云八神文玉輦六羽警瑤溪戒道伊川北通旌澗水西
御圖開洛匱刻石與天齊瑞日波中上仙禽霧裏低微臣矯弱翮抃舞接
鸞鷺

劉軻與馬植論史官書云文皇帝受命有若魏鄭公楊仁卿牛鳳及

朱子奢

文德皇后挽歌云神京背紫陌驪駟結行軛北失橫橋道西分清渭流寒

光向壟沒霜氣入松楸今日泉臺路非是濯龍遊
子奢蘇州人正觀時爲諫議大夫善文辭爲人樂易能劇談以經誼緣飾
每侍宴帝令論難羣臣

庾抱

賦得胥臺露詩云胥臺旣落室荆棘稍侵扉棟折連雲影梁摧照日暉翔
鶴遂不反巢燕反無歸唯有團階露承曉共霑衣
抱仕隋爲元德太子學士高祖起兵太子封隴西公以抱爲記室文檄皆
出其手俄爲東宮學士正觀初徙趙王友卒

張文恭

七夕詩云鳳律驚秋氣龍梭靜夜機星橋百枝動雲路七香飛映月廻雕
扇凌霞曳綺衣含情向華幄流態入重闈歡餘夕漏盡怨結曉驂歸誰念
分河漢還憶兩心違

文恭正觀時人與房元齡辛丘馭李懷儼趙洪智劉禕之陽仁鄉上官儀

李淳風等同修晉書名爲御撰

陳叔達

字子聰陳宣帝子武德初判納言太宗時拜禮部尙書明辯善爲容

初年詩云和風起天路嚴氣銷冰井索索枝未柔厭厭漏猶永

春首詩曰雪花聯玉樹冰彩散瑤池翔禽遙出沒積翠遠參差

又早春桂林殿應詔詩曰金鋪照春苑玉律動年華朱樓雲似蓋丹桂雪
如花水岸街堦轉風條出柳斜輕輿臨太液仙露酌流霞

聽隣人琵琶詩云本自龍門桐因妍入漢中香由羅袖裏聲逐朱絃中離
有相思韻翻將入塞同關山臨却月花藥散迴風爲將金谷引添令曲未
終

薛收

琵琶賦云惟茲器之爲宗總羣樂而居妙應清角之高節發號鐘之雅調
處躁靜之中權執疎密之機要遏浮雲而散彩揚白日以垂耀爾其狀也

龍腹鳳頭熊據龍旋戴曲履直破觚成圓虛心內受勁質外宣磅礴象地
穹崇法天候八風而運軸感四氣而鳴絃金華徘徊而月照玉桂的歷以
星懸

收字伯褒蒲州人善屬文爲秦王府主簿陝東大行臺金部郎中武德七
年卒太宗卽位語元齡曰收若在朕當以中書令處之收與弟德音元欽
齊名號河東三鳳收爲長雛德音爲鸞鷲元敬年最少爲鷓雛

唐詩紀事卷第四

王珪

褚亮

虞世南

蔡允恭

許敬宗

劉孝孫

魏徵

楊師道

岑文本

李百藥

來濟

長孫無忌

杜正倫

馬周

李義府

陳子良

杜之松

崔善爲

王績

王珪

詠漢高祖云漢祖起豐沛乘運以躍鱗手奮三尺劍西滅無道秦十月五星聚七年四海賓高抗威宇宙貴有天下人憶昔與項王契闊時未伸鴻門既薄蝕滎陽亦蒙塵蟻虱生介冑將卒多苦辛爪牙驅信越腹心謀張陳赫赫西楚國化爲丘與榛

詠淮陰侯韓信云秦王日凶慝豪傑爭共亡信亦胡爲者劍歌從項梁項羽不能用脫身歸漢王道契君臣合時來名位彰北討燕承命東驅楚絕糧斬龍堰濰水擒豹潛夏陽功成享天祿建旗還南昌千金答漂母百錢

酬下鄉吉凶成糾繆倚伏難預詳弓藏狡兔盡慷慨令心傷

珪字叔介相太宗母李最賢老杜詩有我曾老姑爾之高祖母謂李也

褚亮

字希明錢塘人警敏工爲詩貞觀中爲散騎常侍武德四年太宗爲天策上將軍宮城西開文館下教以杜如晦房玄齡于志寧蘇世長薛收褚亮姚思廉陸德明孔穎達李玄道李守素虞世南蔡允恭顏相時許敬宗薛元敬蓋文達蘇勛竝以本官爲學士收卒以劉孝孫補之使亮爲贊

奉和詠日午詩云曦車日亭午浮箭未移暉日光無落照樹影正中圍草萎看稍靡葉燥望疑晞晝寢慙經笥暫解入朝衣

燭花詩云蘭逕香風滿梅梁暖日斜言是東方騎來尋南陌車靨星臨夜燭眉月隱輕紗莫言春稍晚自有鎮開花

賦蜀都詩云列宿光輿井分土跨梁岷沈犀對江浦駟馬入城闈英圖多霸跡歷選有名臣連騎簪纓滿含章詞賦新得上仙槎路無待訪嚴遵

秋鴈云日暮霜風急羽翮轉難任爲有傳書意翩翩入上林

秋享送文舞用舒和歌云御辰合宮承寶曆帝圖王館奉明靈偃武修文九圍泰沈烽靜柝八荒寧

祀五方用舒和歌云笙歌籥舞屬年韶鷺鼓鳧鍾樂歲豫調露初迎綺春節承雲遽踐蒼霄馭

樂府詞云高臺暫俯臨飛翼聳輕音浮光隨日度漾影逐波深迴瞰周平野開懷暢遠襟獨此三休上還傷千里心

奉和禁苑餞別應令詩云大蕃初錫瑞出牧邇皇京暫以綠車重言承朱邸榮舒桃臨遠騎垂柳映軍營惠化宣千里威風動百城禁籞芳嘉節神襟餞送情金笳催別景玉管切離聲野花開且落山鳥哢還驚微臣夙多幸薄宦奉儲明鈞臺暫作賦伊水濫聞笙懷德良知久酬恩識命輕

和望月應魏王教詩云層軒澄皎月流照滿中天色共梁珠遠光隨趙璧圓影落臨秋扇輪虛入夜仙所欣東館裏預奉西園篇

虞世南

和鑿輿頓戲下詩云重輪依紫極前耀奉丹霄天經戀宸扆帝命扈仙鑣
乘星連鶴禁帶日下虹橋銀書迷曉色全輅轉晨飈霧徹軒營近塵暗苑
城遙蓮花分秀萼竹箭下驚潮撫已慙龍幹承恩集鳳條瑤山盛風樂抽
簡薦徒遙

侍宴應詔詩云芬芳禁林晚容與桂舟前橫空一鳥度照水百花然綠野
明斜日青山澹晚煙濫陪終燕賞握管類窺天

奉和詠日午詩云高天淨秋色長漢轉曦車玉樹陰初正桐圭影未斜翠
蓋飛圓影明鏡發輕花再中良表瑞共仰璧輝賒

奉和月夜觀星應令詩曰早秋炎景暮初弦月彩新清風滌暑氣零露淨
囂塵薄霧銷輕縠鮮雲卷夕鱗休光灼前曜瑞彩接重輪緣情摛聖藻竝
作命徐陳宿草誠踰濫吹噓偶搢紳天文豈易述徒知仰北辰

又春夜詩云春苑月徘徊竹堂侵夜開驚鳥排林度風花隔水來

凌晨早朝云萬戶宵光曙重簷夕霧收玉花停夜燭金壺送曉籌日暉青
瑣殿霞生結綺樓重門應啟路通籍引王侯

詠舞詩云繁絃奏淥水長袖轉迴鸞一雙俱應節還似鏡中看

賦得吳都詩云畫野通淮泗星躔應斗牛玉牒宏圖表黃旗美氣浮三分
開霸業萬里宅神州高臺臨茂苑飛閣跨沈流江濤如素蓋海氣似朱樓
吳越自有樂還似鏡中遊

賦飲馬長城窟云馳馬渡河干流深馬渡難前途錦車使都護在樓蘭輕
騎猶銜勒疑兵尙解鞍溫池下絕棧澗道接危巒拓地勳未賞亡城律詎
寬有月關猶暗經春隴尙寒雲昏無復影冰合不聞湍懷君不可遇聊持
報一餐

賦鶴云飛來雙白鶴奮翼遠凌煙雙棲集紫蓋一舉背青天颺影過伊洛
流聲入管絃鳴儔倒景外刷羽闔風前顧步已相失徘徊各自憐危心猶
警露哀響詎聞天無因振六翮輕舉復隨仙

賦結客少年場云韓魏多奇節倜儻遺名利共矜然諾心各負縱橫意結
友一言重相思千里至淥沈明月弦金絡浮雲轡吹簫入吳市擊筑遊燕
肆尋源博望侯結客遠相求少年垂一顧長驅背隴頭燄燄戈霜動耿耿
劍虹浮天山冬夏雪交河南北流雲起龍沙暗水落鴈行秋輕生徇知己
非是爲身謀

怨歌行云紫殿秋風冷雕甍落日沈裁紈悽斷曲織素別離心掖庭若改
畫長門不惜金寵移恩稍薄情踈恨轉深香銷翠羽帳絃斷鳳凰琴鏡前
紅粉歇階上綠苔侵誰言掩歌扇翻作白頭吟

門有車馬客云陳遵重交結田蚡擅豪華曲臺臨上路高門抵狹邪赭汗
千里馬繡轂五香車白鶴隨飛蓋朱鷺入鳴笳夏蓮開劍水春桃發綬花
高談辨飛兔摛藻握靈蛇逢恩出毛羽失路委泥沙曖曖風煙晚路長歸
騎遠日斜青瑣第塵飛金谷苑危弦促柱奏巴渝遺簪墮珥解羅襦如何
守直道翻使谷名愚

擬古云塗山烽埃驚弭節度龍城冀馬樓蘭將燕犀上谷兵劍寒花不落
弓曉月逾明凜凜嚴霜節冰壯黃河絕蔽日卷征蓬浮天散飛雪全兵值
月滿精騎乘膠折結髮早馳驅辛苦事旌麾馬凍重關冷輪摧九折危獨
有西山將年年屬數奇又燿火發金微一作微連營出武威孤城塞雲起絕
障虜塵飛俠客吸龍劍惡少縵胡衣朝摩骨都壘夜解谷蠡圍蕭關遠無
極蒲海廣難依沙磴離旌斷晴川候馬歸交河梁已畢燕山旆正揮方知
萬里相侯服有光輝

顏師古隋朝遺事載洛陽獻合蒂迎輦花煬帝令袁寶兒持之號司花女
時詔世南草征遼指揮德音敕於帝側寶兒注視久之帝曰昔傳飛燕可
掌上舞今得寶兒方昭前事然多愁態今注目於卿卿才人可便嘲之世
南爲絕句學畫鷓鴣黃半未成垂肩鞞袖大愁生緣愁卻得君王惜長把花
枝傍輦行

世南越州人太宗每稱其有五絕德行忠直博學文詞書翰也既卒帝曰

世南於我猶一體拾遺補闕無日忘之蓋當代名臣人倫準的今其二云亡石渠東觀中無復人矣

蔡允恭

允恭在隋時奉和出潁至淮詩云久倦川涂曲忽此望淮圻波長泛淼淼眺迴情依依稍覺金烏轉漸見錦帆稀欲知仁化洽謳歌滿路歸

允恭荊州江陵人工爲詩在隋時煬帝有所賦必命諷誦遣教宮人允恭恥之授內史舍人固辭絲是疎斥隋亡歸唐貞觀初除太子洗馬卒

許敬宗

奉和正月臨朝云天正開初節日觀上重輪百靈滋景祚萬土慶維新待旦敷玄造韜旒御紫宸武帳臨光宅文衛象鈎陳廣庭揚九奏大帛麗三辰發生同化育播物體陶鈞霜空澄曉氣霞景瑩芳春德暉覃率土相賀奉還淳

奉和七夕應制云牛閨臨淺漢鸞駟涉秋河兩河縈別緒一宿慶停梭星

模鈿裏靨月寫黛中娥奈許赤宵度長嬰離恨多

又應制云婺閨期今夕娥輪泛淺潢迎秋伴暮雨待暝合神光薦寢低雲鬢呈態解霓裳喜中愁漏促別後怨天長

七夕賦詠云一年抱怨嗟長別七夕含態始言歸飄飄羅襪光天步灼灼新妝鑒月輝方迎巧笑開星靨不惜呈露解雲衣所歎卻隨更漏盡掩淚還弄昨宵機

敬宗字延族杭州人太宗時檢校黃門侍郎高宗時中書令在唐史姦臣傳

劉孝孫

詠笛詩云涼秋夜鳴笛流風詠九成調高時慷慨曲變或淒清征客懷離緒鄰人思舊情幸以知音顧千載有高聲

早發成臯望河詩云清晨發巖邑車馬走轅轅迴瞰黃河上愴悅屢飛魂鴻流遵積石驚浪下龍門仙槎不辨處沈璧想猶存遠近洲渚出颯沓鳧

鴈喧懷古空延佇歎逝將何言

孝孫荊州人貞觀六年遷太子洗馬未拜卒

魏徵

正日臨朝應詔詩云百靈待軒后萬國會塗山豈如今睿哲邁古獨光前
聲教溢四海朝宗別百川鏘洋鳴玉佩灼爍耀金蟬淑景輝雕輦高旌揚
翠煙庭實超王會廣樂盛鈞天既傾東日戶復詠南風篇願奉光華慶從
斯億萬年

出關作云中原初逐鹿投筆試戎軒縱橫計不就慷慨志猶存杖策謁天
子驅馬出關門請纓係南越憑軾下東蕃鬱紆陟高岫出沒望平原古木
吟寒鳥空山啼夜猿既傷千里目還驚九逝魂豈不憚艱險深懷國士恩
季布無二諾侯嬴重一言人生感意氣功名誰復論

徵字玄成魏州人相太宗致太平天下既治懼帝喜武功嘗賦詩曰終藉
叔孫禮方知皇帝尊帝曰徵言未嘗不約我以禮徵亡帝賦詩曰望望情

何極浪浪淚空泫無復昔時人芳春共誰遣

太宗在洛陽宮幸積翠池宴酣各賦一事帝賦尙書曰日昃翫百篇臨燈披五典夏康既逸豫商辛亦流湏恣情昏主多克己明君鮮滅身資累惡成名由積善徵賦西漢曰受降臨軹道爭長趨鴻門驅傳渭橋上觀兵細柳屯夜宴經柏谷朝遊出杜原終藉叔孫禮方知皇帝尊帝曰徵言未嘗不約我以禮

楊師道

字景猷清警有才思貞觀十年拜侍中參預朝政後爲大常卿每與文士宴歌詠自適帝見其詩爲譎諷嗟賞後賜宴帝曰聞公每酣賞捉筆賦詩如宿成試爲朕爲之師道再拜少選輒成無所竄定一坐嗟伏

春朝閒步詩云偃沐乘閒豫清晨步北林池塘藉芳草蘭芷襲幽衿霧中分曉日花裏弄春禽野徑香常滿山階筍屢侵何須命輕蓋桃李自成陰又秋初夜坐應詔詩云玉瑄涼初應金壺夜漸闌蒼池流稍潔仙掌露方

溥鴈聲風處斷樹影月中寒爽氣長空淨高吟覺自寬

賦終南山用風字韻應詔詩云眷言懷隱逸輟駕踐幽叢白雲飛夏雨碧
嶺冠春虹草綠長楊路花疎五柞宮登臨日將晚蘭桂起香風

詠硯云圓池類璧水輕翰染煙花將軍欲定遠見棄不應賒

詠飲馬應詔詩云寶馬權奇出未央雕鞍照曜紫金裝春草初生馳上苑
秋風欲動醉長楊鳴珂屢度章臺側細蹠徑向濯龍傍徒令漢將連年去
宛城今已獻名王

詠弓詩云霜重鱗膠勁風高月影圓鳥飛隨帝輦鴈落逐鳴弦

還山宅詩云暮春還舊嶺徙倚玩年華芳草無行徑空山正落花垂簾掃
幽石臥柳礙浮槎鳥散茅簷靜雲披澗戶斜依然北泉路猶是昔煙霞

彈鳴琴詩云北林鵲夜飛南軒月馭進調絃發清徵蕩心祛褊悵變作離
鴻聲還入思歸引長嘆未終極秋風飄素鬢

又詠琴詩云久擅龍門質孤竦嶧陽名齊娥初發弄趙女正調聲嘉客勿

遽反繁絃曲未成

詠笙詩云短長插鳳翼洪細摹鸞音能令楚妃歎復使荆王吟切切孤竹
管來應雲和琴

詠舞云二八如迴雪三春類早花分行向燭轉一種逐風斜

又詠飲馬應詔曰清晨控龍馬弄影出花林躩蹠依春澗聯翩度碧潯苔
流染絲絡水潔寫調音一御瑤池駕詎憶長城陰

賦隴頭水云隴頭秋月明隴水帶關城笳添離別曲風送斷腸聲映雪風
猶暗乘冰馬屢驚霧中寒鴈至沙上轉蓬輕天山傳羽檄漢地急徵兵陣
開都護道劍聚伏波營於茲覺無渡方共濯朝纓

正月臨朝應詔云皇猷被寰宇端展屬元辰九重麗天色千門臨上春

岑文本

字景仁鄧州人中書侍郎顏師古以譴罷太宗曰朕自舉一人授文本侍
郎專典機要

奉和元日臨朝詩云時雍表昌運日正叶靈符德兼三代禮功包四海圖
踰沙紛在列執玉儼相趨清蹕喧輦道張樂駭天衢拂蜺九旗映儀鳳八
音殊佳氣浮仙掌薰風繞帝梧天文光七政皇恩被九區方陪瘞玉禮珥
筆岱山隅

奉述飛白書勢詩云六文開玉篆八體曜銀書飛毫列錦繡拂素起龍魚
鳳舉崩雲絕鸞驚遊霧疎別有臨池草恩霑垂露餘

李百藥

字重規定州人隋內史令德林子也翰藻沈鬱詩尤其所長樵斵皆能諷
之

正月臨朝應詔詩云化曆昭唐典承天順夏正百樂警軒陛三辰揚旆旌
充庭富禮樂高讌齒簪纓獻壽符萬歲移風韻九成

少年詞云始酌文君酒新吹弄玉簫少年不歡樂何以盡芳朝千金笑裏
面一擲掌中腰掛冠豈憚宿迎拜不勝嬌寄語少年子無辭歸路遙

郢城懷古云客心悲暮序登墉瞰平陸林澤窅芊緜山川鬱重複王公資
設險名都拒江隩方城款北門溟海窮南服長策挫吳豕雄圖競周鹿大
蒐雲夢掩壯觀章華築人世更不競西師日侵蹙運圯屬驅馳時屯恣敲
扑莫救夷陵火無復秦庭哭鄢郢遂丘墟風塵俄慘黷狐兔時遊踐霜露
日霑沐釣渚故池平神臺層宇覆陣雲埋夏首窮陰慘荒谷悵矣舟壑遷
悲哉年祀倏雖異三春望終傷千里目

百藥七歲能屬文齊中書舍人陸父嘗過其父德林有說徐陵文者云藉
瑯琊之稻坐客竝不識其事百藥進曰傳稱邳人藉稻注云邳國在瑯琊
開陽縣人皆驚喜云此兒卽神童百藥幼多疾祖母以百藥爲名名臣之
子才行相繼四海名流莫不宗仰藻思沈鬱尤長五言雖樵童牧子亦皆
吟諷及懸車告老怡然自得穿池築山文酒譚詠以盡平生之志年八十
五先是太宗帝京篇手詔曰卿何身之老而才之壯齒之宿而意之新乎
子安期永徽末遷中書舍人自德林至安期三代掌制誥安期孫羲仲又

爲中書舍人

出譚
賓錄

來濟

揚州人父護兒貞觀十八年初置太子司議卽高其選以濟爲之永徽中爲相世謂護兒兒作相世南男作匠是也濟出玉關絕句云斂轡遵龍漢銜悽度玉關今日流沙外垂涕念生還

太宗餞中書侍郎來濟詩云曖曖去塵昏灞岸飛飛輕蓋指河梁雲峰衣結千重葉雪岫花開幾樹妝深悲黃鶴孤舟遠獨歎青山別路長聊將分袂霑襟淚還用持添離席觴

長孫無忌

無忌嘲歐陽詢形狀猥陋云聳膊成山字埋肩畏出頭誰家麟閣上畫此一獼猴詢應聲曰索頭連背暖漫褱畏肚寒祇緣心渾渾所以面團團太宗笑曰詢殊不畏皇后耶太宗嘗謂唐儉酒杯流行發言可喜是時天下初定君臣俱欲無爲酒杯善謔理亦有之高宗雖不君然亦深察事機當

時諸王門雞王勃在沛王府戲爲文檄英王鷄帝見之大怒曰此殆交結之漸卽日竄勃以太宗之賢杯酒一時之樂何足爲後世戒及其弊也中宗詔羣臣曰天下無事欲與羣臣共樂於是迴波豔辭妖冶之舞作於文字之臣而綱紀蕩然矣創業之難也一觴一詠足以肇亂况甚焉者哉

杜正倫

相州人工屬文嘗與中書舍人董思恭夜直論文思恭歸謂人曰與杜公評文今日覺吾頓進顯慶初爲相

侍宴北門詩云大君端展暇睿賞狎林泉開軒臨禁籞藉野列芳筵參差歌管颺溶曳羽旗懸玉池流若釀雲閣聚非煙湛露晞堯日薰風入舜絃大德侔玄造微物荷陶甄謬陪瑤水宴仍廁栢梁篇闕名徒上月鄒辯詎談天旣喜光華旦還傷遲暮年猶翼升中日簪裾奉肅然

馬周

凌朝浮江旅思詩云太清

一作天晴

上初日春水送孤舟山遠疑無樹潮平似

不流岸花開且落江鳥沒還浮羈望傷千里長歌遣四愁

周字賓王博州人嗜學善詩春秋天資曠邁武德中補州助教不治事刺史達奚怒數咎責周乃去客密州趙仁本高其才厚以資使入關留客汴爲浚儀令崔賢所辱遂感激而西至長安客常何家貞觀五年太宗召之後爲中書令

李義府

遙敘封禪詩云天齊標巨鎮日觀啟崇祠峇嶷臨渤海隱嶙控河沂建岳誠爲長升功亮在茲帝猷符廣運玄範暢文思飛聲總地絡載化撫乾維瑞策開珍鳳禎圖薦寶龜東后方肆覲西都導六師肅駕移星苑揚罕馭風司沸鼓喧平陸凝蹕靜通達汶陽馳月羽蒙陰驚電輻巖花飄曙輦峰葉蕩春旗石閭環藻衛金壇映黼帷仙階溢祕柜靈檢耀祥芝三始貽遐貺萬歲受重釐菲質陶恩獎趨迹奉軒墀觸網淪幽裔乘徼限明時周南昔已歎邛西今復悲

詠鸚鵡詩云牽弋辭重海觸網去層巒戢翼雕籠際延思彩霞端慕侶朝聲切離羣夜影寒能言殊可賞相助憶長安

高宗朝義府常賦詩曰鏤月爲歌扇裁雲作舞衣自憐迴雪影好取洛川歸有棗強尉張懷慶好偷竊名士文章乃爲詩曰生情鏤月爲歌扇出性裁雲作舞衣照鑑自憐迴雪影來時好取洛川歸時人爲之語曰活剝張昌齡生吞郭正一

義府初遇以李大亮劉洎之薦太宗召令詠烏義府曰日裏颺朝彩琴中聞夜啼士林如許樹不借一枝棲帝曰與卿全樹何止一枝

義府擅殺寺丞畢正義王義方彈義府疏云臣聞履霜堅冰積小成大請乞重勘當畢正義致死之由雪冤氣於幽泉誅姦臣於白日對仗叱義府不退義方三叱上旣無言義府趨出義方乃讀彈文義府善柔成性佞媚爲心昔事馬周分桃見寵後交劉洎割袖承恩生其羽翼長其光價因緣際會遂階通達不能盡忠端節對揚王休策蹇勵駑祇奉皇眷而反憑附

城社蔽虧日月請託公行交遊羣小貪治容之好原有罪之淳于恐漏洩
其謀殞無辜之正義雖挾山超海之力望此猶輕迴天轉日之威方斯更
劣此如可恕孰不可容金風戒節玉露啟途霜簡與秋典共清忠臣將鷹
鷂竝擊請除君側少益鴻私碎首玉階庶明臣節伏請付法推斷以申典
憲

義府其先瀛洲人與來濟俱以文翰顯時稱來李永徽六年爲相王義方
庭劾之帝陰德義府故貸不問爲抑義方逐之俄進中書令後以罪流振
州朝野相賀

陳子良

詠雪云光映妝樓月花承歌扇風欲妬梅將柳故落早春中

七夕看新婦隔巷停車詩云隔巷遙停幃非復爲來遲只言更尙淺未是
渡河時

得妓詩云微雨散芳菲中園照落暉絳樹搖歌扇綠珠飄舞衣繁絃調對

酒雜引動思歸愁人當此夕羞見落花飛

新宮詞云春色照蘭宮秦女且坐一作窻中柳葉來眉上桃花落臉紅拂塵

開扇匣卷帳卻薰籠衫薄偏憎日裙輕更畏風

子良吳人與蕭德言庾抱同爲太子學士貞觀六年卒

杜之松

和衛尉寺柳詩云漢將本屯營遼河有戍城大夫曾取姓先生亦得名高
枝拂遠鴈疎影度遙星不辭攀折苦爲入管絃聲

之松貞觀中爲河中刺史答王績詩云辱書知不降顧歎恨何已僕幸恃
故情庶迴高躅豈意康成道重不許太守稱官老萊家居羞與諸侯爲友
延佇不獲如何如何奇跡獨全幸甚幸甚敬想結廬人境植杖山阿林壑
地之所豐煙霞性之所適蔭丹桂藉白茅濁酒一杯清琴數弄誠足樂也
此真高士何謂狂生僕憑藉國恩濫尸貴部官守有限就學無因延頸下
風我勞何極前因行縣實欲祇尋誠恐燉煌孝廉守琴書而不出酒泉太

守列鐘鼓而空還所以遲迴遂攬轡也僕雖不敏頗識前言道既知尊榮何足恃豈不能正平公之坐敬養亥唐屈文侯之膝恭師子夏雖齊桓德薄五行無疑眊夸故人一來何損蒙借家禮今見披尋微而精簡而備誠經傳之典略閨庭之要訓也

崔善爲

呂才序王無功文集云君河中有渚田十數頃又有隱士仲長子光服食養性君遂結廬河渚貞觀中京兆杜之松清河崔善爲繼爲州刺史皆召之君曰奈何坐召君平邪

答無功冬夜載酒鄉館詩云頒條忝貴郡懸遲久相望處士同楊鄭邦君謝李彊詎知方擁篲逢子敬惟桑明朝蓬戶側會自謁任棠

答無功九日詩云秋來菊花氣深山客重尋露葉疑涵玉風花似散金摘來還汎酒獨坐卽徐斟王弘貪自醉無復覓楊林

善爲貝州人武德中歷尚書左丞諸曹吏惡其聰察嘲其短偃曰崔子曲

如鈞隨例得封侯，髀上全無頂胸前。別有頭高祖勞之曰：齊末姦吏歌斛律明月高緯昏不察，至滅其家朕雖不德幸免。是下令求謗者謗遂止卒於秦州刺史。

王績

晚年敘志示翟處士正師云：弱齡慕奇調，無事不兼脩。望氣登重閣，占星上小樓。明經思待詔，學劍覓封侯。棄繻頻北上，懷刺幾西遊。中年逢喪亂，非復昔追求。失路青門隱，藏身白社遊。風雲私所愛，屠博暗爲儔。解紛曾霸越，釋難頗存周。晚歲聊長想，生涯太若浮。歸來南畝上，更坐北溪頭。古岸多盤石，春泉足細流。東隅誠已謝，西景懼難收。無謂退耕近，伏念已經秋。庚桑逢處跪，陶潛見人羞。三晨甯舉火，五月鎮披裘。自有居常樂，誰知身世憂。

建德破後入長安詠秋蓬示辛學士云：遇坎聊知止，逢風忽未歸。孤根何處斷，輕葉強能飛。辛答云：託根雖異所，飄葉早相依。因風若有便，更共入

雲飛

不知辛氏之名今錄于此

古意云幽人在何所紫巖有仙躅月夜橫寶琴此外將

安欲材抽嶧山幹徽點崑丘玉漆抱蛟龍脣絲纏鳳凰足前彈廣陵罷後以光明續百金買一聲千金傳一曲世無鍾子期誰知心所屬又竹生大夏溪蒼蒼富奇質綠葉吟風勁翠莖犯霄密霜霰封其柯鷓鸕食其實寧知軒轅後更有伶倫出刀斧俄見尋根株坐相失裁爲十二管吹作雄雌律有用雖自傷無心復招疾不如山上草離離保終吉又寶龜尺二寸由來潛深水浮游五湖內宛轉三江裏何不深復深輕然至溱洧溱洧源流狹春秋不滿軌漁人遞往還網罟相縈藟一朝去運會剝腸流血死豐骨輸廟堂鮮臙籊籊棄置誰怨尤自我招此否餘靈寄明卜復來欽所履又松生北巖下由來人徑絕布葉稍雲煙挿根擁巖穴自言生得地獨負凌雲潔何時畏斤斧幾度經霜雪風驚西北枝雹隕東南節不知歲月久稍覺枝幹折藤蘿上下碎枝幹縱橫裂行當糜爛盡共坐灰塵滅寧關匠石顧豈爲王孫折盛衰自有時聖賢未嘗屑寄言悠悠者無爲嗟大耋又

桂樹何蒼蒼秋來花更芳自言歲寒性不知露與霜幽人重其德徙植臨前堂連拳八九樹偃蹇二三行枝枝自相糺葉葉還相當去來雙鴻鵠栖息兩鴛鴦榮蔭誠不厚斤斧亦勿傷赤心許君時此意那可忘采鳳欲將歸提羅出郊訪羅張大澤已鳳入重雲颺朝栖崐閩木夕飲蓬壺漲問鳳那遠飛賢君坐相望鳳言何深德微禽安足尙但使雛卵全無令繪繳放皇臣力牧舉帝樂簫韶暢自有來巢時明年阿閣上

春日詩云前旦出園遊林華都未有今朝下堂來池水開已久雪被南軒梅風催北庭柳遙呼竈前妾卻報機中婦年光恰恰來滿甕營春酒

績字無功絳州人兄通大儒也績誕縱與李播呂才善大業末仕爲六合丞嗜酒不任事因解去居河渚間與仲長子光友以周易老子置牀頭他書罕讀也著五斗先生傳醉鄉記無心子傳豫知終日自誌其墓自號東臯子

唐詩紀事卷第五

蕭德言

顏師古

杜淹

裴守真

胡元範

元萬頃

李敬玄

張文琮

薛睿惑

張大安

薛元超

鄭蜀賓

王德真

楊思玄

鄭義真

徐珩

蕭翼

弘執恭

鄭軌

王勣

竇威

蕭德言

詠舞詩云低身鏘玉珮舉袖拂羅衣對簷疑鷺語映雪似花飛

德言字文行正觀中為弘文館學士兼侍讀以年老致仕太宗不許詔曰天下無事方欲建禮作樂偃武修文卿年齒已衰教將何恃所冀才德猶茂臥振高風使濟南伏生猶在茲日拜祕書少監

顏師古

奉和正日臨朝云七政璿衡始三元寶律新負辰延百辟垂旒御九賓肅

唐詩紀事

事

卷第五

一

無錫丁氏校刊

肅皆鴛鷺濟濟盛簪紳天涯重致譯日域獻奇珍

師古字籀自之推以來居關中性簡峭自負其才意望甚高終於祕書監諫議大夫相時其弟也師古叔父遊秦武德初刺廉州州人歌曰廉州顏有道性行同莊老愛人如赤子不煞非時草高祖璽書勞勉之

杜淹

杜淹始見袁天綱於洛天綱謂曰蘭臺成就學堂寬廣又語曰二十年外終恐責黜暫去卽還武德六年以善隱太子俱配流嶺州淹至益州見天綱曰洛邑之言何其神也天綱曰不久卽回至九年六月召入天綱曰杜公至京卽得三品要職淹至京拜御史大夫檢校吏部尙書贈天綱詩曰伊呂深可慕松喬定是虛繫風終不得脫屣欲安如且珍紉素美當與薛蘿踈旣逢楊得意非復久閑居

淹字執禮隋時隱太白山文帝惡之謫戍江表秦王引入爲天策府曹參軍賦詩尤工賜銀鐘楊文幹反辭連太子歸罪淹流嶺州太宗踐阼召爲

御史大夫後檢校吏部尚書參預朝政卒

裴守真

和太子納妃詩曰瑜珮升青殿穠華降紫微還如桃李發更似鳳凰飛金屋貞離象瑤臺起婺徽綵纓紛碧坐績羽泛禴衣

雲路移凋輦天津轉明鏡仙珠照乘歸寶月重輪映望園喜宴洽主第懽娛盛絲竹揚帝薰簪裾奉宸慶

縈雲藹曉光湛露晞朝陽天文大景麗容藻眷詞芳玉庭散秋色銀宮生夕涼太平起遂古萬壽樂無疆

守真絳州人高宗時太常博士天授中爲司憲府丞覈詔獄多裁恕不合武后旨出刺成州徙寧州卒

胡元範

奉和太子納妃詩云帝子威儀絕宮妃禮慶優疊鼓陪山觀凝笳翼畫翮鬱鬱神香滃弈弈彩雲浮排空列錦罽勝觀溢皇州

金闈未息火玉樹鍾天愛月路飾還裝星津動歸珮紫極流宸眷清規佇
慈誨恩波洽九流光輝軼千載

側席詔親賢式宴坐神仙聖文飛聖筆天樂奏鈞天曲池涵雅景文字孕
祥煙小臣同百獸率舞悅堯年

高宗子洪爲太子納妃有司奏費用白鴈適苑中獲之帝喜曰漢獲朱鴈
爲樂府歌今得白鴈爲婚贅婚乃人倫首我則無慙

太子後諡
孝欽皇帝

裴炎請武

后歸政后以炎有異圖捕送詔獄元範爲鳳閣侍郎曰炎有功於國臣明
其不反后曰炎有反端顧卿未知耳元範曰若炎反臣輩亦反矣后曰朕
知炎反卿輩不反遂斬炎

元範申州義陽人介廉有才以炎故流死嶺州

元萬頃

春日池臺詩云日影飛花殿風紋積翠池鳳樓通夜敞虬輦望春移

春日詩云花輕葉亂仙人店葉密鶯喧帝女葉飛雲閣上春應至明月樓

中夜未央

又曰鳳輦迎風乘紫閣鸞車避日轉彤闈中塘促管淹春望後殿清歌開
夜扉

奉和太子納妃公主出降詩云离元應春夕帝子降秋期鳴瑜合清響冠
玉麗濃輝和聲躋鳳掖清影步鸞墀

從李勣征高麗爲遼東道管記勣令別將赴平壤糧不及期萬頃作離合
詩密報勣勣曰軍機切遽何以詩爲欲斬之言狀乃免勣令作文檄高麗
其語有不知守鴨淥之險莫離支報云謹聞命矣遂移兵鴨淥軍不得入
萬頃坐是流嶺外遇赦還爲北門學士累遷鳳閣侍郎坐事誅

李敬玄

奉和別魯王詩云綠車旋楚服丹蹕佇秦川珠臯轉歸騎金岸引行旂一
朝限原隰千里間風煙鷺喧上林右鳧響御溝前斷雲移魯蓋離歌動舜
絃別念凝神展崇恩洽玳筵顧惟慙叩寂徒自仰鈞天

又奉和別越王詩云飛蓋迴蘭坂宸襟佇柏梁別館分涇渭歸路指衡漳
關山通曉色林籟徧春光帝念紆千里詞波照玉潢

敬玄亳州人該覽羣籍尤善於禮高宗在東宮馬周薦其材召入崇賢館
侍讀後相高宗儀鳳中劉仁軌奏河西鎮守非敬玄不可帝強遣之由是
大敗於湟川魯王靈夔高祖子也歷五州刺史越王正太宗子武后時爲
豫州刺史

張文琮

水詩云標名資上善流派表靈長地圖羅四瀆天文載五潢方流極玉潤
圓折動珠光獨有蒙園吏棲偃玩濠梁

賦橋詩云造舟浮渭日鞭石表秦初星文遙瀉漢虹勢尙凌虛已授文成
履空題武騎書別有臨濠上樓偃獨觀魚

和陽舍人詠中書有花樹詩云初藥映春叢參差間早紅因風時落砌雜
雨乍浮空影照鳳池水香飄鷄樹風豈不愛攀折希君懷袖中

文琮同潘屯田冬日早朝云假寐懷古人夙興瞻曉月通辰禁門啓冠蓋
趨朝謁霜靄清九衢霞光照雙闕紛綸人物紀煥爛聲明發腰劍動陸離
鳴玉和清越

文琮高宗宰相文瓘弟也貝州人好自寫書正觀中爲治書侍御史永徽
中拜戶部侍郎出爲建州刺史卒

文琮賦蜀道云難梁山鎮地險積石阻雲端深谷下寥廊層崑上鬱盤飛
梁架絕嶺棧道絕危巒攬境猶長息方知斯路難

薛孝宗諱惑

進船於洛水詩云禁園紆眷覽仙棹叶宸遊洛北風花樹江南彩畫舟榮
生蘭蕙草春入鳳凰樓興盡離宮暮煙光起夕流

世傳孝宗諱惑善投壺背後執矢投之龍躍隼飛百發百中

張大安

奉別越王詩云盛藩資右戚連萼重皇情離襟愴睢苑分途指鄴城麗日

開芳甸佳氣積神京何時驂駕入還見謁承明越王太宗子武后時爲豫州刺史

大安公謹之子上元中同中書門下三品章懷太子 令與劉訥言等共

註范曄漢書太子廢故貶普州刺史終橫州司馬

薛元超

和同太子監守違戀詩云儲禁銅扉啓宸行玉軼遙空懷壽街吏尙隔寢門朝北首瞻龍戟塵外想鸞鑣飛文映仙誥濟惠叶神飈帝念紆蒼陸乾文煥紫霄歸塘橫筆海平圃振詞條欲應重輪曲鏘洋韻九韶

元超收之子也高宗時爲給事中轉中書舍人薦士若任希古郭正一崔融等皆以才自名上元初同中書門下三品政出武后因陽暗乞骸骨卒高宗爲太子也元超爲舍人太宗親征時元超韓王元嘉同太子監守賦

違戀詩

鄭蜀賓

蜀賓滎陽人善五言年老爲江左一尉親朋餞於上東門蜀賓賦詩曰畏途方萬里生涯近百年不知將白首何處入黃泉酒酣詠歌聲調哀戚竟卒於官時長壽中也

王德眞

和過溫湯詩云握圖開萬寓屬聖啓千年驪阜䟽緹騎驚鴻映彩旃玉霜明鳳野金陣藻龍川祥煙聚危岫慶水溢飛泉停輿興睿覽還舉大風篇德眞武后時爲納言房先敏以罪貶訴於相府內史騫味道曰太后旨劉禕之曰乃上從有司所奏云后聞貶味道而以禕之爲忠臣德眞推順曰戴至德無異才惟能歸善於君爲時所服后曰善

楊思玄

湯泉詩云豐城觀漢迹溫谷幸秦餘地接幽王壘塗分鄭國渠風威肅文衛日彩鏡雕輿遠岫凝氛重寒叢樹影踈廻瞻建章闕佳氣滿宸居

奉和別魯王詩云元王詩傳奏文后寵靈優未若動宸眷龍章送遠遊潼

關疎別道灞岸引行舟北林分苑樹東流溢御溝鳥聲含吹咽騎影曳花
浮聖澤九垓遍天文七曜周方翹獻雅樂簪帶奉鳴球

高宗時人

鄭義真

溫湯詩云洛川方佇蹕豐野暫停鑿湯泉常獨涌溫谷豈知寒漏鼓依巖
畔相風出樹端嶺煙遙聚草山月迥臨鞍日用誠多幸天文遂仰觀

高宗時人

徐珩

日暮望涇水詩云導源經隴阪屬汭貫羸都下瀨波常急廻圻溜亦紆毒
流秦卒斃泥糞漢田腴獨有迷津客懷歸軫暮途

高宗時人

蕭翼

太宗以翼爲監察御史克使取羲之蘭亭序真蹟於越僧辯才翼初作北

人南遊一見款密留宿設缸面酒江東缸面猶河北曰甕頭蓋初熟酒也
酣樂之後探韻賦詩才探來字詩云初醞一缸開新知萬里來披雲同落
莫步月共徘徊夜久孤琴思風長旅鴈哀非君有祕術誰照不燃灰翼探
招字詩云邂逅款良霄慙慙荷勝招彌天俄若舊初地豈成遙酒蟻傾還
泛心狡躁似調誰憐失羣翼長苦業風飄既而以術取其書以歸本名世翼
南部新書曰蘭亭序武德四年歐陽詢就越詐求之始入秦王府麻道嵩
奉教楊兩本一送辯才一王自收道嵩私楊一本正觀二十三年褚遂良
請入昭陵

弘執恭

和平涼公觀趙郡王妓詩云小堂羅薦陳妙妓命燕秦翠眉凝假黛紅臉
自含春合舞俱迴雪分歌共落塵齊竽不可廁空願上龍津

賦劉生云英名振關右雄氣逸江東遊俠伍都內來去三秦中劍照七星
影馬控千金驄縱橫方未息因茲定武功

劉生不知何代人齊
梁以來歌爲三秦遊

鄭軌

觀兄弟同夜成婚詩云棠棣開雙萼天桃照兩花分庭含珮響隔扇偶粧華綺風俱似雪映綺共如霞今霄二神女併在一仙家

王勤

詠妓詩云妖姬飾淨粧窈窕出蘭房日照當軒影風吹滿路香早時歌扇薄今日舞衫長不應令曲誤持此試周郎

勸武德正觀間人有集五卷

竇威

出塞曲云匈奴屢不平漢將欲縱橫看雲方結陣卻月始連營潛軍渡馬邑楊旆掩龍城會勒燕然石方傳車騎名

威字文蔚沈邃有器局貫覽羣言諸兄詆爲書癡武德初爲內史令

唐詩紀事卷第六

上官儀

郭正一

喬知之

喬侃

員半千

任希古

蘇味道

杜審言

郭利正

吳少微

富嘉謨

李福業

王適

李崇嗣

上官儀

字游韶陝州人工詩其詞綺錯婉媚及貴人效之曰上官體

詠雪詩云禁園凝朔氣瑞雪掩晨曦花明棲鳳閣珠散影娥池飄素迎歌

上翻花向午移幸因千里映還繞萬年枝

又奉和山夜臨秋詩云殿帳清炎氣輦道合秋陰淒風移漢筑流水入虞

琴雲飛送斷雁日上淨疎林滴瀝露枝響空濛煙壑深

又和穎川公秋夜詩云沈寥空色遠葉黃淒序變洞浦落遵鴻長飆送巢

燕千林流夕景萬籟含宵轉峻雉聆金柝層臺砌銀箭

王昭君云玉關春色晚金河路幾千琴悲桂條上笛怨柳花前霧掩臨妝

月風驚入鬢蟬裁書待迴使淚盡白雲天

高宗承貞觀之後天下無事儀獨持國政嘗凌晨入朝巡洛水堤步月徐
轡詠詩曰脈脈廣川流驅馬入長洲鵲飛山月曙蟬噪野風秋音韻清亮
羣公望之猶神仙焉

高宗卽位儀爲相麟德元年坐梁王忠事下獄死武后惡之也儀詩中用
影娥池時無解其事祭酒令狐德棻召張柬之等十餘人示此詩柬之對
云洞冥記漢武帝於望鶴臺西起臺曰望月臺臺下穿影娥池每登臺眺
月影入池中使宮人乘舟笑弄月影因名影娥池亦曰眺蟾臺令狐德棻
嘆其博識

郭正一

定州人永隆中平章事武后專國出刺陝州與張楚金元萬頃皆爲周興
誣殺之

和太子納妃公主出降詩云桂宮初服冕蘭掖早升筭禮盛親迎晉聲芬

出降齊金龜開瑞鈕寶翟上仙袿轉扇承宵月揚旌照夕蜺

喬知之

知之馮翊人武后時爲補闕

有綠珠篇云石家金谷重新聲明珠十斛買娉婷昔日可憐君自許此時
歌舞得人情君家閨閣不曾關好將歌舞借人看富貴英雄非分理驕奢
勢力橫相干別君此去終不忍徒勞掩淚傷紅粉百年離別在高樓一旦
紅顏爲君盡蓋知之有寵婢曰碧玉知之爲之不婚爲武承嗣所奪知之
以此歌寄之而末句云百年離別在高樓一旦紅顏爲君盡寵者結於衣
帶投井而死承嗣見詩大恨知之坐此陷亡

沈佺期贈知之古意云盧家小婦鬱金堂海鷺雙栖玳瑁梁九月寒砧催
木葉十年征戍憶遼陽白狼河北音書斷丹鳳城南秋夜長誰知含愁獨
不見使妾一作更教明月照流黃

通鑑考異云唐歷及本紀殺知之在天授元年據陳子昂別傳云武攸宜

討契丹子昂知之爲參謀尙在萬歲通天元年子昂有西還至散關答知之詩云昔君事胡馬余得奉戎旃攜手同沙塞關河緬幽燕歎此南歸日猶聞北戍邊是時未罷也疑知之死在神功年後或天授初承嗣銜之至是乃殺之耳

喬侃

人日登高云僕本多悲者年來不悟春登高一遊目始覺柳條新杜陵猶識漢桃源不辨秦塹若昇雲霧還似出囂塵賴得煙霞氣淹留攀桂人
沈佺期送喬隨州侃云結交三十載同遊一萬里情爲契闊生心由別離
死拜恩前後人從宦差池起今爾歸漢東明珠報知己

侃武后時學士預修三教珠英知之之弟也開元初爲兗州都督長安中卒於襄陽以文詞知名

員半千

隴右途中遭非語云趙有兩毛遂魯聞二曾參慈母猶且惑况在行路心

冠冕無醜士賄賂成知己利名我所無清濁誰見理弊服空逢春緩帶不著身出遊非懷璧何憂乎忌人正須自保愛振衣出世塵

半千字榮期齊州人長事王義方義方曰五百歲一賢者生子宜當之因

改今名

始名慶餘

舉八科皆中累爲弘文館學士睿宗立召爲太子右諭德表

丐骸骨事五君有清白節

與王劇路敬淳石抱中武后時同爲弘文館學士

任希古

字敬臣棣州人五歲喪母七歲問父何以報母父曰揚名顯親可也乃刻志從學年十六刺史崔樞欲舉秀才自以學未廣遜去後舉孝廉虞世南器其人爲弘文學士終太子舍人

奉和太子納妃公主出降詩云帝子陞青陞王姬降紫宸星光移雜佩月彩薦重輪龍旌翻地杪鳳管颺天濱槐陰浮淺瀨葆吹翼輕塵

和長孫祕監伏日苦熱云玉署三時晚金羈五日歸北林開逸徑東閣敞閒扉池鏡分天色雲峰減日輝游鱗映荷聚驚翰遶林飛披襟揚子宅舒

嘯仰重闈

和東觀羣賢七夕臨泛昆明云秋風始搖落秋水正澄鮮飛眺牽牛渚激賞鏤鯨川岸珠淪曉魄池灰斂曙煙泛查分寫漢儀星別架天雲光波處動月影浪中懸驚鴻絳蒲弋游鯉入莊筌萍葉疑江上菱花似鏡前長林代輕幄細草卽芳筵文華開翠瀨筆海控清漣不挹蘭罇聖空仰桂舟仙薛元超永徽初爲中書舍人薦希古郭正一王義方孟和貞崔融十餘人時論美之

蘇味道

趙州人與里人李嶠號蘇李武后時爲相世號摸稜手上元云火樹銀花合星橋鐵鎖開暗塵隨馬去明月逐人來遊妓皆穠李行歌盡落梅金吾不禁夜玉漏莫相催

詠霧詩曰氤氳超洞壑遙裔而平疇乍似含龍劍還疑映蜃樓拂林隨雨密度逕帶煙浮方謝公超步終從彥甫遊

又詠虹詩曰紆餘帶星渚窈窕架天濶空因壯士見還共美人沈逸照含
良玉神光藻瑞金獨留長劍彩終負昔賢心

贈封御史入臺詩云故事推三獨茲辰對兩闈夕鴉共鳴舞屈草接芳菲
盛府題清橐殊章動繡衣風連臺閣起霜就簡書飛凜凜當朝色行行滿
路威唯當擊隼去復覩落鵬歸

又始背洛城秋郊矚目奉懷臺中諸侍御詩云薄遊忝霜署直指戒冰心
荔浦方南紀衡臬暫北臨山晴關塞斷川暮廣城陰場圃通圭甸溝塍礙
石林野童來捃拾田叟去謳吟蟋蟀秋風起蒹葭晚露深帝城猶鬱鬱征
傳幾駸駸迴意披書地勞歌謝所欽

杜審言

和李大夫嗣真奉使存撫河東云六位乾坤動三微歷數遷謳歌移火德
圖讖在金天子月開階統房星受命年禎符龍馬出寶錄鳳凰傳地卽交
風雨都仍卜澗灑明堂惟御極清廟乃尊先不宰神功運無私大象懸八

荒平物土四海接人煙已屬羣生泰猶言至道偏璽書傍問俗旌節近推
賢秩比司空位官臨御史員雄詞執刀筆直諫下樓船國有大臣器朝加
小會筵將行備禮樂送別仰神仙城闕周京轉關河陝服連稍觀汾水曲
俄指絳臺前姑射聊長望平陽遂宛然舜耕餘草木禹鑿舊山川昔出諸
侯靜一作無何霸業全中軍掃戰敵外府絕兵權隱隱帝鄉遠瞻瞻肅命

虔西河偃風俗東壁挂星躔井邑枌榆社陵園松柏田榮光朝掩代佳氣
曉侵燕雨霈鴻私滌風行睿旨宣惇嫠訪疾苦屠鈞探貞堅人樂逢刑措
時康洽賞延賜踰秦氏給恩倍漢家錢擁傳咸翹首稱觴競比肩拜迎彌
道路舞詠溢郊鄗殺氣西衝一作白窮陰北土玄飛霜遙度海殘月迴臨

邊緬邈朝廷問周流朔塞旋興來探馬策俊發抱龍泉學總八千卷文傾
三百篇澄清得使者作頌有人焉未以崇班閔而云勝託捐偉材何磊落
陋質幾翩翹江海寧爲讓巴渝輒自牽一聞歌聖道助曲荷陶甄

和韋承慶過義陽公主山池五首野興城中發朝英物外求情懸朱紱望

契動赤松遊海鷺巢書閣山雞舞畫樓雨餘清晚夏共坐北巖幽其一逕轉

危峯逼橋斜缺岸妨玉泉移酒味石髓換羹香綰霧青條弱牽風紫蔓長

猶言行樂少別向後池塘其二攜琴遶碧沙搖筆弄清霞杜若幽庭草芙蓉

曲沼花宴遊成野客形勝得仙家往往留仙步登攀日易斜其三攢石當軒

倚懸泉度牖飛鹿麝衝妓席鶴子曳童衣園果嘗難遍池蓮摘未稀卷簾

先待月應在醉中歸四其賞翫奇他日高深愛此時池爲八水背峯作九山

疑池靜魚偏逸人閒鳥欲欺青溪留別興更與白雲期五其

贈崔融詩云十年俱薄宦萬里各他方雲天斷書札風土異炎涼太息幽

蘭紫勞歌奇樹黃日疑懷叔度夜似憶眞長北使從江表東歸在洛陽相

逢慰疇昔相對敘存忘草深窮巷毀竹盡故園荒雅節君彌固衰顏余自

傷人事盈虛改交游寵辱妨雀羅爭去翟鶴氅更尋王思極歡娛至朋情

詎可忘連騎追佳賞城中及路傍琴樽橫宴席巖沼臥詞場三川宿雨霽

四月晚花芳復此開懸榻寧唯入後堂興酣鴈舞言洽鳳凰翔高選俄

遷職嚴程已飭裝撫躬銜道義攜手戀輝光玉振先推美金銘舊所防勿
嗟離別易行役共時康

贈蘇味道詩云北地寒應苦南庭戍不歸邊聲亂羌笛朔氣卷戎衣雨雪
關山暗風霜草木稀胡兵戰欲盡漢卒尙重圍雲淨妖星落秋深塞馬肥
據鞍雄劍動揮筆羽書飛輿馬還京邑朋遊滿帝畿方期來獻凱歌舞共
春輝

蓬萊三殿侍宴奉勅詠終南山應制詩云北斗掛城邊南山倚殿前雲標
金闕迴樹杪玉堂懸半嶺通佳氣中峯遶瑞煙小臣持獻壽長此戴高天
子美贈閻丘師詩云吾祖詩冠古同年蒙主恩謂審言以詩閻丘以字同
侍武后也

審言字必簡襄州人初貶吉州司戶與同僚不叶司馬周季重司戶郭若
訥誣以罪繫獄審言子并年十三因季重酒酣懷刃刺之季重臨死曰吾
不知審言有孝子若訥誤我亦焉避害審言因此免官還東都則天召將

用之問曰卿喜否審言舞蹈謝因作懽喜詩授著作郎神龍初坐通張易
之流峯州入爲修文館學士卒將死謂宋之問武平一曰吾在久壓公等
今且死固大慰但恨不見替人云與李嶠崔融蘇味道爲文章四友審言
卒李嶠以下請加命時武平一爲表云審言譽鬱中朝文章前列是以升
榮粉署擢秀蘭臺往以微瑕久從遠謫陛下膺圖玉展下制金門收賈誼
於長沙返蔡邕於左校審言獲登文館預奉屬車未獻長卿之辭遽啓元
瑜之悼臣等積薪增愧焚芝盈感伏乞恩加朱紱寵及幽泉假飾終之儀
舉哀榮之典庶弊帷莫棄墜履無遺乃贈著作郎制曰漢覃恩祐方慶於
同時漳浦沈疴忽歸於厚夜蒿里修文之地永闕音徽蓬山著作之曹宜
加寵數

開階統漢覃
字俱未詳

郭利正

上元云九陌連燈影千門共月華傾城出寶騎
而路轉香車爛熳唯愁曉周遊不問家
更逢清管發處處落梅花

吳少微

少微和崔日用遊開元寺詩云左憲多材雄故人尤鷲鸚護贈單于使休
軺太原郭館次厭煩歆清懷尋寂寞西緣十里餘北上開化閣初入雲樹
閒冥蒙未昭廓漸出欄幌外萬里秋景灼歲晏風落山天寒水歸壑鑿物
頌幽景三乘動玄鑰但敷相解言永用忘昏著

少微新安人與富嘉謨齊名友善進士擢第累授晉陽尉與富嘉謨並拜
監察御史時臥疾聞嘉謨亡號哭賦詩維三月癸丑河南富嘉謨卒予時
寢疾於洛陽北里聞之投枕而起淚霑乎衽席匍匐於寢門之外病不能
哭仰天而呼曰天乎天乎俾予曷所朋曷可得而見乎賦詩曰吾友適不
死於戲社稷臣直祿非造利長懷大庇人乃通承明籍遇此敦牂春藥厲
其可畏皇穹故匪仁疇昔與夫子孰云異天倫同病一相失茫茫不重陳
子之文章在其殆尼父新鼓興幹河岳貞詞毒鬼神可悲不可朽車轄沒
荒榛聖主賢爲寶吁茲大國貧詞人莫不歎美旣而病亟歎曰生死人之

大分吾何恨焉然官職十分未作其一乃至是耶慷慨而終

少微爲并州長史張仁亶進九鼎銘表其略曰昔者夏后氏作鼎羣牧貢金遠方圖物備諸山澤以禦魑魅厥後嗣德昏亂鼎遷於商夏之衰也杞不足徵殷既有之又患失之周德休明神寶不墜百代可繼伏乞陛下光大而當之若乃崇貴之器金玉之鼎鎔首山發睢上列太廟序明堂克明靈命以奉上帝非愚臣所敢議也

富嘉謨

明冰篇云北陸蒼茫河海凝南山闌干晝夜冰素彩峩峩明月升深山窮谷不自見安知探斲備嘉薦陰房涸沍掩寒扇陽春二月朝始噉春光潭沍度千門明冰時出御至尊彤庭赫赫九儀備腰玉煌煌千官事明冰畢歲周在位憶昔沙朔寒風漲崑崙長河冰始壯漫汗峻嶒積亭障噉噉鳴鴈江上來禁苑池臺冰復開搖青涵綠映樓臺幽歌七月王風始鑿冰藏用昭物軌四時不忒千萬祀

嘉謨武功人長安中爲晉陽尉吳少微者亦尉晉陽有魏倚谷者爲太原主簿時稱北京三傑天下文章尙徐庾浮俚不競嘉謨少微本經術雅厚雄邁人爭慕之號吳富體嘉謨終於右臺監察御史張說論其文曰如孤峯絕岸壁立萬仞濃雲鬱興震雷俱發誠可畏也若施於廊廟則駭矣

李福業

嶺外守歲詩云冬去更籌盡春隨斗柄回寒暄一夜隔客鬢兩年催
福業調露二年登第後爲御史五王誅二張亦與謀及誅

王適

幽州人終雍州司功參軍

詠江濱梅云忽見寒梅樹開花漢水濱不知春色早疑是弄珠人

陳子昂列傳時幽人王適見感遇詩曰是必爲海內文宗矣

蜀中言懷詩云獨坐年時暮常懷志不通有時須問影無事卽書空棄置
如天外生涯似夢中蓬踪猶是客華髮欲成翁跡滯魂逾窘情乖路轉窮

別離同夜月愁畏隔秋風老少悲顏叟盈虛悟翟公時來不可問何用求
童蒙

李崇嗣

寒食絕句云普天皆滅燄而地盡藏煙不知何處火來向客心然
毛云或作沈佳

覽鏡云歲去紅顏盡愁來白髮新今朝開鏡匣疑是別逢人
毛云或作李嗣宗

獨愁云聞道成都酒無錢亦可求不知將幾斗銷得此來愁

陳子昂題李三書齋云灼灼青春仲悠悠白日昇聲容何足恃榮吝坐相
矜願與金庭會將待玉書徵還丹應有術煙駕共君乘

又酬李參軍詩云弦望如朝夕寧嗟蜀道行

又酬李參軍旅館見贈云昨夜銀河半星文犯遙漢今朝紫氣新物色果
逢眞言從天上落乃是地仙人白璧疑冤楚烏裘似入秦摧藏多古意歷
覽備艱辛樂廣雲雖覩夷吾風未春鳳歌空有問龍性詎能馴寶劍終應

出驪珠會見珍未及馮公老何驚孺子貧青雲儻可致北海憶孫賓皆與
福業酬唱也

沈佺期黃口讚序云聖歷中有勅東觀修書黃口飛落鉛槧閒奉宸主簿
李崇嗣命采花哺之河東薛曜邀余爲讚